

RETAMAXIK RI KAQCHIKEL CH'AB'ÄL

ROX WUJ



Xkitz'ib'aj:

Olga Leticia Secay Choy

Hector Sincal Toj

Alberto Esquit Choy

B'anöy Wachib'äl:

Margarita Ramírez

Universidad Rafael Landívar
Instituto de Lingüística
Guatemala, 1992.

RETAMAXIK RI KAQCHIKEL CH'AB'ÄL

ROX WUJ



Xkitz'ib'aj:

Olga Leticia Secay Choy

Hector Sincal Toj

Alberto Esquit Choy

B'anöy Wachib'äl:

Margarita Ramírez

Universidad Rafael Landívar
Instituto de Lingüística
1992

Colección:	Materiales Educativos en Lenguas Mayas
Serie:	Kaqchikel
Área:	Lenguaje
Directora de Colección:	Guillermina Herrera
Editor:	Ernesto Loukota S.
Autores:	Olga Leticia Secay Choy Héctor Sincal Toj Alberto Esquit Choy
Ingreso y diagramación:	Rolando Chacach Catú
Portada e ilustración:	Margarita Ramírez

© 1992 Universidad Rafael Landívar

KA'I' OXI' TAQ TZIJ PA RUWI' RE WUJ RE'

Run wuj nqaya' chi awäch wakamin k'o ka'i' oxi' na'oj kichin qawinaq pa taq qatinamit chi rupam, nkitzijo' ri kik'ayewal kib'anon pe ri qawinaq pa taq qatinamit, ri kirayb'äl ri xtani', ri alab'o' richin man nkitz'ila' ta ki' chik ri qawinaq, ri tzij kib'anon kian ri qati't chi kiwäch ri qate' qatata', ronojel re' nqajo' chi ch'aqa chik qawinaq yesik'in chi ruwäch re wuj nqaya' pan aq'a' wakamin.

Ri rub'anikil re wuj re', nab'ey k'o jun tzijonik, k'a ri' nk'utux jun ka'i' oxi' taq tzij chi awe chi rij ri tzijonik richin nab'ij achike ri xq'ax kan chi awäch toq xasik'ij. Toq xatzolij yan ri nk'utux chi awe chi rij ri tzijonik, k'a ri' nk'utux achike naq'ijuj chi rij re jun tzijonik re', ri jun na'oj, ri jun k'aslemal ntzijox chi rupam re tzijonik re'. Pa ruk'isib'äl k'a ri' nya'ox ka'i' oxi' taq tzij ri xb'ix chi rupam ri tzijonik, ri k'o k'ayewal richin nq'ax chi qawäch.

Ronojel ri tzijonik, ronojel ri nk'utux chi rupam re wuj re', ronojel ri na'oj k'o chi rupam re wuj re', ronojel ri k'aslem ntzijox chi rupam ja ri qawinaq xetzijon, ja ri qawinaq xenuk'un, ja rije' yeyo'on pan aq'a' re jun wuj re' wakamin, nqarayb'äj k'a chi xtqa ta chi awäch richin xtach'ob', xtanojij ta rij chi kijujunal re tzijonik nb'ix wawe'.

Nqajo' k'a chi re jun wuj re' xtk'atzin ta richin xtqaya' ruq'ij ri qach'ab'äl richin man xtqamestaj ta ri qach'ab'äl kiya'on kan ri qati't qamama' chi ke ri qate' qatata'; richin chuqa' nqatzijo' ri qarayb'äl, ri qak'ayewal, ri qana'oj, ri qak'aslemal chi ke ri qawinaq chi rupam re jun ka'i' oxi' taq tzijonik re'.

Nqajo' nqamatyoxij chi ke ri qawinaq xkitzijo' ri kik'aslem chi qe, xkitzijo' ri kik'ayewal, xkitzijo' ri kirayb'äl, xkitzijo' ri kinojb'al chi qe richin nqaya' chi iwäch rix, matyox chi ke rije'.

Chuqa' nqamatyoxij chi re ri tinamit Holanda roma ri ruto'ik rik'in pwäq xkiya' pe richin xel re jun wuj re', re wakamin nqaya' chi iwäch. Matyox chi ke rije'.

NAB'EY TZIJONĪK

RUK'AYEWAL RI MANÄQ TATA'AJ KIK'IN RI ALK'WALAXELA'

Ri nuk'aslem rin ri janipe' in k'iynäq pe manäq nutata' xk'oje' wik'in, xa qayon kik'in ri wach'alal xojk'oje'. Rin xitijöx richin ninwetamaj ninsik'ij ruwa wuj akuchi' man ntoj ta.

Ri nurayb'äl rin ja ri nink'isib'ej nutijonik, nink'is ri waqi' juna' richin ke ri k'o ützi nink'äm pe chi ke ri nute' chuqa' ri taq nuchaq'. Wakamin in b'enäq rox juna' pa ruwi' ri waqi' juna' xinb'än yan kan. Ri nurayb'äl rin ja ri nb'ek'oje' nuchuxtaq richin ützi jub'a' ngak'wa'j ri qak'aslem kik'in ri wach'alal.

Rin ninwajo' nintzijoq taq röj xojk'i'y pe: öj ka'i', chi öj ka'i' taq xojk'i'y pe manäq qatata', xa qayon, manäq kan ta ützi chuxtäq yeqakusaj, b'aj jotöl kajil, xa kan ruyon qajnäq kajil yeqakusaj. Chi öj ka'i' xojk'oje' pa tijobäl.

Rin xinwetamaj ruwäch ri nutata' k'a pa b'eleje' juna', k'a ri xinwetamaj ruwäch. Jun q'ij ri nutata' xch'o'n rik'in ri nute', xub'ij chi re:

—Kojk'oje' junan kik'in ri qalk'wa'l richin nk'oje' jun kikotem qik'in röj, richin nk'oje' jub'a' qachuxtäq chuqa' richin nkik'ül pixab'anik ri ak'wala'.

Jun tata'aj k'o chi nuk'üt ützi pixab'anik chi kiwäch ri ralk'wa'l, roma ri' taq rije' xkik'wa'j ki' jun b'ey chik. Röj xojel el wawe', xojb'e qa B'oko', chi ri' xb'enwelesaj pe ri nab'ey juna' tijonik richin ri nab'ey taq waqi' juna'. Man xitikir ta xink'is ri nab'ey juna', xa xe pa nik'aj xik'oje' wi kan. Chi rij ri' xinuqa qa wawe', k'a ri' xunk'isa' qa ri nab'ey, ruka'n, rox k'a ri ruk'isib'äl juna'. Taq xineli chi rupam re re', rin manäq kan ta janipe' q'axomal xink'äm pe, matyox chi re ri nute' nutata' in kito'on pe, ja ri manäq kan ta q'axomal nub'anon pe.

Taq ri nute' xkik'äm pe ki', rija' k'o waqxaqlajuj rujuna' taq xinaläx rin. Ri nutata' k'o rik'in jun chik ixöq. Ri nute' nutata' k'a jantäq nkitzu' ki'. Ri nute' man nrajo' ta nb'e rik'in ri nutata'. Ri nute' k'o k'i'y q'axomal nril rik'in rija' roma nuk'ulula' ri jun chik ixöq pa taq b'ey, k'i'y q'axomal nril roma man xkik'wa'j ta ki'.

Taq xkik'wa'j ki' ri nute' nutata', röj xojb'e qa B'oko', chi ri' xojb'ek'oje' wi richin ke ri ninwil jun ajowab'äl kik'in rije' chuqa' richin nqatün qi' qonojel, richin yojk'oje' junan roma wawe' manäq kikotem ta.

Rin taq xinna' q'anij nuwäch, taq nintz'et chi manäq nutata', rin b'aj janina k'i'y mul xink'utuj qa zachike roma taq manäq nutata'? Man jani kan ta jeb'el k'o nuna'oj ngab'ij chi re ri', man ninb'ij ta rin junan rik'in jun nima winäq. Jun ak'wal k'o chi nk'oje' rutata' rik'in taq k'o pa rachoch, rik'in ri te'ej ri tata'aj.

Man wetaman ta rin chi kan qitzij nk'oje' ri tata'aj awik'in richin yaruchojmirisaj rik'in ütztzij. Rin xuqa jeb'el chi nuk'u'x chi rin k'o nutata', xe k'a ri nutata' ri k'o rik'in jun chik ixöq. K'a ri' rin xinch'öb':

—k'o jun q'ij rin xkib'ech'o'n rik'in ri nutata'.

Xb'e'apon k'a ri q'ij taq rije' xkik'wa'j ki', ja ri taq xinna' rin chi xinwil jun kikotem kik'in, roma rije' xkik'wa'j ki'. Ojer, taq manäq ri nutata' taq ninwil q'axomal ninnük' ¿Achöq chi re ninb'ij wi, achike nchojmirisaj ri nuk'aslem? Kan qitzij na wi, taq man k'o ta ri nutata', taq xa xe ri nute', ri wati't rik'in jun chik nuchaq' e k'o, taq manäq nutata', achi'el man ninwil ta achike ri ninwajo'.

Ri nutata' chuqa' xrajo' ta xuya' jub'a' qapwaq, xa ja k'a ri nute' ma jun b'ey xuk'ül ta chi ruwäch ri nutata' roma taq k'a k'äs na ri numama', rija' man nqa ta chi ruwäch nya'öx kan pwäq chi re ri nute', ri numama' xrajo' ta chi rin xik'oje' ta nuyon, xa man ke ta ri' xub'än, rije' xkik'wa'j ki'. Ri nutata' xurayij ta xto'on richin ta chi xiruto' rik'in ri nutijonik nya'öx chi we taq xik'oje' pe chi rupam ri nab'ey tijob'äl.

Taq xkik'wa'j ki' rije' kan k'o xujel ri', roma taq manäq ri nutata' nk'atzin k'iy chuxtäq chi we, man jani kan ta k'o jeb'el nuna'oj, man jani kan ta wetaman achike nk'atzin ri etamab'äl. Xa ta ninb'än rin achi'el ta wakamin, manäq ta k'o ri nutata' wik'in, rik'in jub'a' man ta yib'e chik, xa xe ta rox, ruka'n juna' welesan ta kan. Roma ri nute' man kan ta janipe' k'o rik'in richin ta nuya' chi we. Ri nute' k'iy juna' xsamäj chi qij, man ta xtikir xuya' ronojel richin yitijöx, richin ninwetamaj ninsik'ij ruwa wuj.

Rujalon jub'a' ri' ri qak'aslem roma rija' xk'oje' qik'in, k'o rusamaj, rin ninwil ri ajowab'äl rik'in kikotem, rik'in achike ninb'än richin ninchojmirisaj ri man ützt ta nk'ulwachitäj pa wachoch.

Ri k'iy xito'on rin ja ri nute', ja rija' xya'on rajäl richin xitijöx. Nqab'ij qa chi re, man kan ta janipe' k'iy xuya' chi we, xa xe k'a ja rija' xya'on, xukanoj achike xub'än richin xiruto', richin rin xiq'ax pe ri nab'ey juna'.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike roma man k'o ta rutata' taq xk'iy pe rija'?
2. ¿Achike juna' tijonik b'enäq wakamin?
4. ¿Achike xjalatäj pa ruk'aslem taq xkik'wa'j chik ki' jumul ri rute' rutata'?
5. ¿Achike roma nk'atzin ri rute' chuqa' rutata' chi re rija'?
6. ¿Achike ruk'ayewal rilon pe rija' pa ruk'aslem?
7. ¿Achike roma kijachon ki' ri rute' rutata'?

CH'OBONĪK

Achike naq'ijuj rat chi rij re jun tzijonĭk xasik'ij ruwäch wakamin. Tatz'ib'aj ri naq'ijuj chi rij.

TZIJ UKUSAN CHI RUPAM RE TZIJONĪK RE YE'

Toq, taq. K'atzinel richin nab'ij taq k'o jun xb'anatäj.

Manäq, man k'o ta. Nukusäx richin toq k'o achike nuk'utuj jun winäq, richin naq'alajirisaj chi ruwäch.

Akuchi'. Richin nab'ij ri xb'anatäj: jun samaj, jun k'ayewal, jun nimaq'ij.

Rik'in. Richin nab'ij achike ri awachb'il, achike rachb'il jun chĭk.


Re re', re ye'. Richin nak'üt jun chuxtäq k'o naqaj chi awe.

La la', la ye'. Richin nak'üt jun chuxtäq k'o näj chi awe.

B'aj. Yalan, janĭla.

Q'anej. Eqal.

Che re'. Chi re'.



RUKA'N TZIJONĬK

RI K'ASLEM WAKAMIN

Re wakamin, peja' re k'aslem roma man nkitz'ila' ta ki' ri ak'wala'. Ri ojer, man nkiya' ta pwäq pa qaq'a' ri qate' qatata', xa ja na ri rije' nkilöq' achike ok ri nk'atzin chi qe, ri man xuya' ta chi awe k'o ta' k'a ri'. Ri wakamin ri ak'wala' kiyon chi kiwa yeb'ekiloq'ola' pe achike nkajo', xe nseger el, ja' pwäq nkik'utuj, jun kimaq'uq', jun nik'aj taq kimaq'uq' nya'öx el chi ke.

—¡Peja' re wakamin! —yicha' qa rin.

¿Achike la re'? Ch'aqa winäq nkib'ij chi ütz, ch'aqa chik nkib'ij chi man ütz ta. ¿Achike la re'?

Re wakamin, rin ninb'ij chi ütz chik, roma: peja' kitzyaq ri ak'wala', peja' nkitij ri winäq, man ke ta ri ojer, man k'o ta qatzyaq, janíla ri way'jal, janíla ri meb'äl. Ke ri' rub'anon pe la wachb'il cha', xb'e pa taq'aj che re rukanuxik rusamaj, xb'erujosq'ij ruxe' kape', xb'eruwuxu' b'o'j, man nch'akon ta ütz, janíla rutz'ilon pe ri'.

Ja k'a re wakamin, la achi'a' yetiko'n ke re nkib'ij:

—Ri winäq ri ojer, man k'o ta kina'oj, roma ri', man k'o ta kichuxtäq, man k'o ta kulew, man k'o ta kixoral nkilöq', roma ri' man k'o ta kina'oj, —yecha' la yetiko'n wakamin.

Achike roma toq xk'oje' pe jub'a' tiko'n wakamin roma ri ruchuq'a' nya'öx ri ulew, ri ojer ri xa man jun achike ta nya'öx rik'in ri tiko'n richin yek'iy. Ri nata' ri ojer, ronojel ri pa k'isis nb'ix che re, ja la kakis taq wakäx, kakis taq kej, yerumes chi rukojol k'isis, k'a ri yerujok, yerunojsaj jujun taq koxtar yeruk'uwa'j chi rupam ri rawän, ja ri nuyala' chi ruxe' ri rawän.

Wakamin man k'o ta chik nk'atzin chi kiwa la rukis chiköp. Ri achi'a' wakamin ruyon chik la ruchuq'a' ulew nk'ayix, kaka', ox'ox koxtar nkiya' chi ruxe' jujun k'an, roma ri peja' pwäq, roma la ruchuq'a' ulew nkiya' chi ruxe' la tiko'n. Roma ri nub'ij la wichib'il:

—We xtik'is la ruchuq'a' ulew, ja k'a nb'ek'is la tiko'n.

Roma xa ja la ye' nya'on kitiko'n ri achi'a', mani ri taq awän man yek'iy ta ye'el pe, roma xa man k'o ta ruchuq'a' nkiya' chi ruxe'. Ke ri' xub'anala' ri ojer, yalan ri meb'a'il.

Konojel meb'a'il kitz'ilon pe ki', ja ri' k'a yeb'ek'iy pe wakamin manäq chik k'a, roma chi rupam la tiko'n xek'iy wi pe.

Ri ojer k'o ta k'a ulew, man ke ta wakamin xe chuqa' ulew nkajo' ri achi'a', xe chik ri ulew nkilöq' ja re' k'o pwäq roma la tiko'n nkib'än. K'o nkib'ij chi nkitik lajuj, wolajuj k'an ichaj, xa xe janila chik ri rajäl nkik'ayij, roma ri' nloq'otäj ri ulew. Ri ojer ruyon awän, man k'o ta rajäl. Ri wichib'il nijun ntikir nub'än, xe wi rukinaq', ti rawän, xe wi ri nutik.

Chuqa' ri rajil samaj ri chi q'ij junan b'enäq ri rajil rik'in ri tiko'n nb'an. Ri ojer ri toq k'a k'o na ri ánima wichib'il xyalöj xyawäj el, nk'atzin ti nupwaq, xa man k'o ta akuchi' npe wi. Toq k'o nk'utun rusamaj chi we, yikikot nuk'utuj rusamaj chi we, po nik'aj pwäq ri jujun kuku' ya', nik'aj q'ij yineran ya' che re ri ninch'äk juwinäq pwäq, nub'ij chi we:

—Tb'eapon na kan nuway, —ncha' chi we.

—Ütz k'a, —yicha' che re rin.

Yikikot toq ke ri' nb'ix samaj chi we, nb'epono' ri wäy, xe ok ti lajuj pwäq nya'öx pe chi we, chi ruwa ri jun bojo'y ke'en. Ke ri' xoqa ri ch'aqa chik ruwachinel k'o chi nalöq', jun ti peraj ati', waqi' pwäq naya' kan chi ruwa, jun pisaj awatz'am kaji' taq pwäq, ke ri', xa junan b'enäq ri rajäl ri chuxtäq, roma b'a ok nach'äk, po jantape' qajnäq ok rajil ri taq chuxtäq. La chum ri jun pwäq ri waka!, ützi jub'a' rajil xa xe k'a man nawil man jun ri nach'äk. Re wakamin jotöl rajil ri aq'ij po jotöl chuqa' rajil ri chuxtäq. ¡Ay ajaw!, achike xtiqab'än qa.

Achike la k'a juwil ri, xu k'o k'a k'iy chuxtäq wakamin ri chuqa' xu k'a junan b'enäq. Ke ri' ninb'ij rin:

—K'ayew re q'ij xqaq'asisaj pe, xqatz'et pe juwil ruyon k'ayewal.

Wakamin ützi jub'a', xa ja chik ri yab'il, ja chik k'a ri', man k'o ta rutzil. Achike xtab'än xu xe toq nuqa qa.

TATZ'IB'AJ RI NK'UTÜX CHI AWE PA RUWI' RE TZIJONIK RE YE'

1. ¿Achike rub'eyal ri k'aslem ojer?
2. ¿Achike rub'eyal ri k'aslem wakamin?
3. ¿Achike roma wakamin ützi tikon nkib'än ri achi'a'?
4. ¿Ri ojer achike nya'öx rik'in ri ulew richin ruchuq'a'?
5. ¿Achike roma manäq kichuxtaq ri ojer taq winäq?
6. ¿Achike kisamaj nkib'än ri ojer richin nkiq'axb'ej ki'?

CH'OB'ONIK

Achike nab'ij rat, ützi man ützi ta ronojel re xtziyöx.

TZIJ UKUSAN CHI RUPAM RE TZIJONĪK RE YE'

Pwäq. Peq.

Peja'. Janíla üt, janíla jeb'el, tik'asäs.

Juwil. Jurayil.


Miyax. Nya'öx.

Kuku'. Q'e'l.

Achike la'. Achike na'.

Chi ruwa. Chi ruwäch.

Mani. Ne', toq nab'ij chi man nk'achoj, man nb'anatej ta, roma jun nab'ey chuxtäq.



ROX TZIJONĪK

RI SAMAJ RICHIN NQAQ'AXB'EJ QI'

Richin nqaq'axab'ej qi' k'o chi nqab'än qasamaj, k'o chi nqakanuj ruwachinel qasamaj; nqab'än k'ayinik, nqato' qi' rik'in qasamaj.

Rin richin ninq'axb'ej wi' pa jay ninkanuj la okusan chik tzyäq, ja la ye' ninkanuj, ja la ye' nink'ayij. Juntäq ninch'äk junitz' ti nupeq chi rij ri taq tzyäq, ja ri' ninkusaj richin ninq'axb'ej wi', man janipe' ta k'iy xa ja ri ninkusaj, kan ta k'iy nupeq manäq xa kan eqal yiq'ax kik'in ri ak'wala'.

Ri ch'aqa nimalaxela' wal taq nkil jub'a' taq kipeq juntäq nkiya' ka'i', wo'o' maq'uq' chi we, juntäq taq manäq kik'in man jun achike nkiya' chi we.

Ri ojer chuqa' xipeteyaj pa nimatinamit, ninb'än el ti nub'osel, xa man kan ta k'iy ninch'äk chi rij, ja ri' ninb'än pe ti nuloq'oj chi re, ninlök' pe taq nukab', nuq'utu'n, ke ri' yinuqa qa chi wachoch.

Ri achin janila oyowal nub'än wik'in roma nq'ab'är, janila ratixal, k'a ri' nub'ij chi we:

—Akuchi' na ach'akon pe re', —ncha' chi we.

Xa ba chike ri ninlök' pe, ninlök' pe ti nuq'utu'n, ja ri ninb'än richin yojwa' qa, ja ri nub'ij chi we:

—Akuchi' na ach'akon pe re', —ncha' chi wichin.

Ja ri' k'o jantäq q'ab'arel nuqa qa, ja ri' janina nub'ij chi we. Juntäq k'a, man q'ab'arel ta, man jun nub'ij.

Ja ri' xe ok jun q'ij ti juwewäs ninb'än el jub'a' ti nub'osel, xa xek'iyir chuqa' re ak'wala' chi nuwa man yitikir ta chik ninb'än el nub'osel, xe chik kilixik ri ak'wala', xe ri ninb'än. Taq xink'ayij b'osel xa kan xe ri ninb'än el wawe' richin nb'ek'ayij apo chi la' pa nimatinamit, taq yitzolin pe, man jun chik nink'am pe xa kan xe janipe' ok xinch'äk pe ri, ja ri' ninkusaj qa, ja ri' nink'is chi man jun chik kan ta achike k'ayij ninb'än. Ja ri chuqa' k'ayew xiq'ax rik'in ri achin.

Wakamin roma nuyon, kan yitikir jub'a', akuchi' yib'e wi, yib'e. Yib'e pa wuxuj ichaj, pa wuxuj alb'ertix nenb'ana' ch'ajo'n chi taq jay, yib'eq'inon kik'in winaqi', nenb'ana' nuq'in. Jun maq'uq' ninch'äk jun q'ij, che re ri ninch'äk, ninlök' nik'aj etab'al ti nukab', nik'aj etab'al ti nuxkoya', xe ok ri ninlök' el, ja ri nanya' chi ke ri taq wal; ke ri' k'a nub'anon pe.

Wakamin man yib'e ta chik pa wuxuj ichaj, wakamin ja ri taq tzyaq ukusan chik ja ri yenkanuj, ja ri' ninch'ak jun ti nupeq chi rij, ja chik ok ri ninkusaj richin ninq'axab'ej wi'. Xe chik ri' ninb'an wakamin.

Wakamin utz chik jub'a' yiq'ax, man ke ta toq k'o ri achin, roma rija' b'aj natixan, man jun utz yinel wi. Wakamin roma nuyon, akuchi' yib'e wi ninwil el jun ti nuk'ayij, ja ri yib'e', ja ri ninwil jub'a' ti nupeq kan stape' xe richin ninq'axb'ej wi', wakamin utz jub'a' ninwil, man ke ta ri' toq k'o ri achin.

Toq xinuqa qa rik'in chik ri walte':

—Tab'ana' b'o'j, —ncha' chi we'.

Toq nk'achoj nik'aj etab'al:

—Ja ri wakamin ngalöq' chik nik'aj etab'al ab'atz', ja ri' nab'an jun apo't, —ke ri' nub'ij chi we.

K'a ri', toq nk'achoj nub'atz', ninb'ij apo che re. K'a ri' nulöq' chik ch'aaq nub'atz', k'a ri' ninb'atzij. Nulöq' chik bätz' k'o rub'onil, yensol chik ri taq nub'atz', k'a ri' xinb'an jun ti nupo't.

Ke ri' ri xek'achoj nupo't k'a pa jun ka'i' juna', k'a ri' xinlök' jun ti wuq. Ke ri', pa kaka' juna' ninlök' jun ti wuq, k'a ri' ninb'an jun ti nupo't.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achöj chi re nuq'axb'ej wi ri' ri ixöq ntzijon re tzij re ye'?
2. ¿Achike rusamaj xya' roma ri ralite'?
3. ¿Achike nuk'ayij rija' wakamin richin nuq'axb'ej ri'?
4. ¿Achike nuk'ayij ojer pa nimatinamit richin nuq'axaj ri' rija'?
5. ¿Achike runa'oj ri rachijil ri ixöq toq k' k'äs na?
6. ¿Achike nulök' ri ixöq che re ri nuch'ak chi rij ri ruk'ayij?
7. ¿Awetaman rat akuchi' k'o wi ri nimatinamit?

CH'OB'ONİK

Tach'ob'o' rij runa'oj ri rachijil re ixöq ntzijon chi rupam re jun k'aslem re ye'.

TZIJ UKUSAN CHI RUPAM RE TZIJONİK RE YE'

Chaq xe. Xa xe, chaq ke ri', xa ke ri'.

Q'utu'n. Rikil.

Anchi'. Akuchi', ankuchi', k'uwi.

B'atz. Chij, b'ätz.

Chi wichin. Chi we.

Junitz'. Jub'a'.



RUKAJ TZIJONĬK

RI ALIB'ATZI'

E k'o lajuj wal, e oxi' xek'ule' taq k'a k'äs ri tata'aj, taq xkôm rija' e wuqu' xek'oje' kan wik'in rin, ja ri' xenwilij. Chi ke ri wuqu' ak'wala' xekib'ek'ama' pe kixjayil e ka'i' wal, ja ri xenwelesaj el wik'in. Ninna' rin chi man yitikîr ta kik'in, man yitikîr ta ninya' che re jun alib'axel ri nk'atzin che re rija'. Ke re' xinb'ij chi ke:

—Rin ninb'ij chi ütz yixel el wik'in, rix la xa k'a iyon, yixtikîr yixq'ax pan ik'aslem
—xinb'ij chi ke ri wali'.

Jub'a' chîk ri xpe chîk jun wali', chuqa' ke re' xinb'ij chi ke:

—Ütz yixel wik'in, rin xa man yitikîr ta yixinwilij, xa k'a e k'o na taq koköj wik'in, ke ri man yitikîr ta iwik'in. Ke ri' xe'el el, xe chîk e wo'o' ak'wala' xekanäj kan wik'in.

Ri wali' yalan ütz k'a kina'oj; ri wali' man k'ïy ta ik' xenk'wa'j roma rin man yitikîr ta ninya' kiq'utu'n, rik'in jub'a' ri ninya' apo chi ke man nkitîj ta, rin xa manäq k'ïy ti nupeq richin ninb'än k'ïy loq'oj, roma ri' xenwelesaj el. Chuqa' man xinwajo' ta rin xenk'wa'j roma rije' jun chîk jay e petenäq wi, ri wochoch rin kan jun chîk wi, xa achike na ok yentîj, roma k'a ri' xenwelesaj chanin. Man jun wali' xyalöj ta wik'in, xe jun ka'i' oxi' ik' xek'oje' wik'in; ri jun nik'aj juna' xkoje' wik'in, ri jun chîk oxi' ik'. Xenwelesaj roma rin man yitikîr ta yenwilij.

Xe chîk taq wal xek'oje' kan wik'in, rije' man yinkitzijoj ta, yinkipoqonaj jub'a'. Jun alib'axel rik'in jub'a' nutzijoj chi man ütz ta ri aq'utu'n, man nutîj ta chi awäch, roma ri' man xeyalöj ta xenk'wa'j.

K'a e k'o na koköj xtaq wal wik'in, rije' k'a nkajo' na kitzyaq, nkajo' rajäl ketamab'al, nkajo' rurikil kiway, rin rik'in k'a rayil poqonal ninch'äk ronojel ri ninya' chi ke, roma k'a ri' xinb'ij chi ke ri ka'i' wal chi xa xe oxi' q'ij yek'oje' el wik'in.

Xinb'ij chuqa' chi ke ri wal:

—Rix la xa ix achi'a', xa ixk'ajola' na, k'a jeb'el yixtikîr yixsamäj richin nich'äk ipeq, richin niq'axaj jab'el iwi' kik'in la iwixjayil, nitîj ri niwajo', man jun achike xkixtz'eton richin npe ta iwoyowal chuqa' richin npe ta koyowal ri iwixjayil.

Roma ri man yixk'oje' ta wik'in richin ke ri' man jun k'ayewal chi qakojöl.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Ütz, man ütz ta kina'oj ri alib'axel?
2. ¿Janipe' ralib'axel xek'oje' ri ixöq ntzijon chi rupam re tzijonik re'?
3. ¿Achike roma xerelesaj el chanin ri ralib'axel rik'in?
4. ¿Janipe' ik' xeyalöj ri rali' rik'in?

CH'OB'ONİK

¿Achike nach'ob' chi rij ri runojb'al re ixöq ntzijon chi rupam re wuj re ye'?

TZIJ UKUSAN CHI RUPAM RE TZIJONİK RE YE'

Alib'axel: alib'ätz



RO' TZIJONİK

RI WINÄQ NKITIJ KIQ'IJ PA RUWI' KIK'ASLEM

Xenimär q'anej ri ak'wala', ri tata'aj xuchöp ruqumik ya', kan nuqüm wi k'a ya' ri' xe man kan ta yalan achi'el nub'än wakamin, wakamin yalan nuqüm ri ya', man yojrumey ta chik, xojrumestaj kan jumül.

Manäq chik kitzyaq ri ak'wala', rin ninlök' jub'a' tzyäq ja ri yentzak'ij, ja ri nintz'is richin ninb'än kipo't taq wal. Ri tata'aj man yojrumey ta, rija' xb'e ruk'u'x chi rij ri ya'. K'a runaj k'a xtzolin ri ruk'u'x, k'a ri' xuya' jub'a' taq qachuxtaq, ri qatzyaq man nulök' ta, manäq, k'a pa kaka' juna' k'a ri' nuya' jub'a' taq qawachinaq.

Achike roma xub'än ke ri', roma ri ya' xuqüm, k'a qajnäq rajil chuxtäq, ronojel qajnäq rajil, xa ja k'a rija' manäq nb'eruch'aka' pe rupwaq richin k'o ta nulök', man jun. Chuqa' ri wachinäq qajnäq kajil xa xe chuqa' ri jub'a' ok nach'äk, achike nqab'än richin nqalök' k'iy qawachinaq man yojtikir ta, k'a runaj k'a xojtikir.

Xqatij qaq'ij, roma röj ojer manaq qixim, xa yojloq'on, manäq qixim, manäq qakinaq', manaq qulew. K'a runaj xk'oje' runa'oj ri achin, k'a runaj xumöl ti rupeq, xa wolajuj rukajk'al che re jun maq'uq' nuch'äk, k'o re xe jun maq'uq' nuch'äk; K'a ri' xumöl, xumöl, eqal xmolotäj jub'a' rupwaq.

Ri ojer k'a qajnäq na rajil ulew, xa kawinaq maq'uq' rajil ri k'an xqaya' kan röj. Eqal eqal xk'oje' ri qaway, man nqatij ta chik poqon, ojer ri' k'o mul k'o qaway k'o mul manäq, xa ke k'a ri' xqakoch' pe ri k'ayewal; k'a ja re öj k'o wakamin. Wakamin xqil jub'a' ti qulew, k'o ti qachoch xa xe k'a ronaj jub'a' xqab'än, xqatij na qaq'ij; rin xisamäj, ninb'än nukem, nink'ayij nupo't, ninb'än kamixa' k'a ri' nink'ayij.

Ri ojer b'aj xeq'ax winaqi' aj näj wawe' k'a k'a ri' xojchojmir jub'a', chi ke ri winäqi' yeq'ax nqak'ayij el qawachinel, xa ke ri' ri xqil jub'a' ti qapeq, xitikir xinb'än ti nuloq'oj, ri achin man jun b'ey xuya' ta nupeq.

Ke ri' xojtikir xqalök' ti qulew, k'o k'a jub'a' qachuxtäq ri' xe man yojtikir ta nqalök', k'a ronaj xojtikir xqalök'. Toq rub'anon tzape k'o qulew, tzape ta k'o qa chuxtäq man jun rub'eyal b'aj öj meb'a', molo' xchojmir ri achin. Ke ri' ri qak'ayewal qaq'axam pe pa qak'aslem, ri ak'wala' e k'o wakamin e chawon chik. Ri ak'wala' xe ajowex, xe ajowex. Nim k'ayewal qaq'axam pe, k'o k'a mul k'o qapeq k'o k'a mul manäq.

Röj taq xqak'wa'j qi' manäq qachoch, man jun achike k'o qik'in, man jun qachoch xya'öx kan, xqakanoj na achike xqab'än richin xqab'än jun ti qachoch, k'a molo' na. Pa jun rex jay xojk'oje' wi, ke ri' rachoch ri wachijil, achike roma

röj xojk'oje' pa jun rex jay, roma kan ninwajo' wi ri achin, chi ri' xojk'oje' pa jun rex jay, manäq k'a qawachinaq, man jun qasi', xa nqab'ekanuj ketaq ri'.

Manäq qulew, man jun; man roma ta k'a ri' nqab'ij chi kan yalan k'ayew ri qak'aslem, manäq, man xojruya' ta pa k'ayewal; k'ayewal k'a chi qe ri' xa xe röj xqakanoj achike xqab'än richin xojq'ax, xinkanoj rub'eyal rin roma wetaman ninb'än nuk'ayij, nink'ayij kape pa taq wotäq, pa taq ox'ox, nik'ayij kab', ninmö! saqmolo' k'a ri' nink'ayij chik el, ox'ox peq nya'öx kan ri saqmolo' chi we, nink'ayij el waqxaqi', ke ri' xqak'wa'j qi'.

Jub'a' chik ri xepe taq qalk'wa'l, man janipe' ta ok nqach'äk, xepe qalk'wa'l, ri achin nsamäj pa b'anoj b'ey, rija' nuch'äk wo'o' rik'in nik'aj, rik'in ri', man yojruq'axaj ta, roma rija' nqab'er, manäq ok ti rupeq, rin ninb'än taq nuk'ayij ja ok ri nqaq'axb'ej qi'.

Jub'a' chik ri' nqakanuj qapeq, yib'e lxim'ulew ninmö! el jo'q, q'oq', k'ix ja ri' nenk'ayij el richin xqaq'axb'ej qi' kik'in ri xtaq wal. Rija', ri achin yiruto' k'a jub'a' ri', xa xe nik'aj manqu' nuya' kan chi we, ri nuya' kan chi we ja ri ninkusaj richin ninlöq' el ruwachinaq rija', ke ri' nuk'is chik el jun b'ey chi qawäch, man jun chik nkanäj kan chi qe röj kik'in ri taq wal. Rin roma wetaman ninb'än nukem, ja ri xinb'än, che re k'a re' xqaq'axab'ej qi' kik'in ri ak'wala', rik'in nupwaq, rik'in kitzyaq, ja ri' xinq'axab'ej wi'.

Ojer kan yasamäj xa man jun rajil ri nab'än, jun ti akem xa kan jub'a' wi ok rajil, jun ti apa's nab'än rajil jun wo'o' rukak'al, wolajuj rukak'al manqu'q'. Nab'än ta apa's xe ok jub'a' nel kan chi rij. Ri b'ätz' qajnäq na ok nawil kan, tab'ana' qa, tak'ayij qajnäq chik ok chuqa'. Ronojel chuxtäq qajnäq rajil, xa chuqa' qajnäq ok nach'äk, manäq janipe' ta ok nqalöq', man jun nloq'otäj ta qawachinaq.

Wakamin nqatij qaq'ij kik'in ri taq wal, ninb'än ti nuk'ayij, ninb'än ti nukem, ronojel ninb'än, xa b'a chike chuxtäq yenwil wetaman chi nk'ayitäj, nink'ayij. Xink'äs el kichuxtäq ri taq wal, xinya' kitzyaq, xinya' ronojel chi ke ri taq wal, man kan ta ronojel k'a ri' ri, xe xinb'än ri k'atzinel chi ruwäch ri Ajaw k'o chi la' chi kaj, xinya' kichuxtäq.

Wakamin k'a ri' xchojmür jub'a' ri achin, rija' xchojmür jub'a', nab'ey pe ri' xa xok nuyab'il.

Wakamin k'a ri' xchojmür, k'a ri' nulöq' kitzyaq ri ruk'ajol, k'a ri' nuya' qachuxtaq, man jun kan ta chik qak'ayewal wakamin. Wakamin k'a ri' jun ka'i' juna' ri üt! qab'anon pe jub'a'.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike k'ayinik xub'än ri ixöq richin xq'ax kik'in ri taq ral?
2. ¿Achike roma man nya'öx ta rupwaq ri ixöq?
3. ¿Achike rub'eyal toq xe'el chi rupam ri meb'a'il ri ntzijon chi rupam re wuj re ye'?
4. ¿Achike ruk'ayewal ruchajin ri achin chi rupam re tzij re ye'?
5. ¿Achike xkib'än richin xetikir xkilöq' jub'a' kulew?
6. ¿Achike jay xeya'öx wi toq xkik'wa'j ki' rije'?
7. ¿Achike rub'anun ri rajil ri wachinäq ri ojer?

CH'OB'ONİK

Tatzib'aj ri nanojij chi rij re jun tzij re xasik'ij, xawak'axaj wakamin.

TZIJ UKUSAN CHI RUPAM RE TZIJONİK RE YE'

Wachinaq. Chuntäq, ruwachinel.

B'atz'. Chij.

Peq. Pwaq, pwäq.



RUWAQ TZIJONİK

RI PIXA' CHI KE RI ALK'WALAXELA'

Ri wal rin man jun b'ey akuchi' ta xeb'e wi, roma rin yenb'ochi'. Ninb'ij chi ke:

—Ke la' nub'än la itata' la', man üt' ta la nub'än, man üt' ta achike nub'än; rix tiloq'oq'äj la itata' —xinb'ij chi ke rin. —Tiloq'oq'ej ruwäch, stape' ntijon ya', stape' k'o qachuxtäq stape' manäq, k'o chi niöq' ruwäch la itata', man jun b'ey kixb'e chi nuwäch, man jun b'ey kixb'e pan ik'. Man jun kixb'e —yicha' chi ke.

Xkak'axaj ri ak'wala' man jun akuchi' ta xeb'e wi.

Ri jun nimalaxel wal, roma k'o oyowal pa qachoch roma ri' taq xb'e, k'a b'aj ko'öl ok taq xb'e rik'in jun achin, k'a ri' waqlajuj rujuna' taq xb'e.

Wakamin k'a k'o jun wal b'enäq pa tijob'äl, xa xchojmür ri kitata' ja rija' nya'on achike nk'atzin che re. Achi'el ninb'ij che re ri wachijil rin:

—Xe ta k'a rajil aya' k'o, ja k'a kichin ri awalk'wa'l ri' man jun achike naya' kan.

Xojchapon ta k'a qi' rik'in ri' xa xe xrelesaj kan ri jun nab'ey qalk'wa'l pa tijob'äl. Chi öj ka'i' xojtojon ri rutijoxik, roma man jub'a' ta ok pwäq nak'is chi rij jun ak'al ri k'o pa tijob'äl; jub'a' k'a ri tata'aj jub'a' k'a rin xqab'än che re ri qameb'äl, wakamin xel yan ri jun. Ri jun chik k'a ri b'enäq, ke ri' ronojel mul nqato' qi' rik'in ri tata'aj. Akuchi' ntijöx wi, rin ninya' el ri nk'atzin che re, ke ri' nqato' qi' rik'in ri wachijil.

Ojer ri' ri wal itzel nkina' che re, juntäq nkich'ojij che re ri kitata':

—¿Achike roma taq ke re' nab'än chi re ri qate'?, janina ruyab'il yan xaya', xojamestaj kan jumül.

Wakamin ri wal nkib'ij chi re ri kitata':

—Röj yojkikot roma xk'is ri q'axom, man jun chik nab'än ta achi'el taq k'a naqüm ri ya'.

Wakamin richin nqaq'axaj qi' nqato' qi', rija' nsamäj rik'in ri ruch'ich, k'o q'ij k'o samaj k'o q'ij xa manäq, man nril ta rejqa'n. Junteq nril jub'a' rejqa'n, ke ri' nub'än. Rin chuqa' yisamäj ja ri nqato' qi' nqaq'axaj qak'aslem.

Rin ninb'än tz'iso'n, yitz'iso'n jub'a', k'o ninchilab'ej, ja ri yenk'ayij nupo't. Rin yenk'ayij po't juk'an chik tinamit, yeb'enk'ayij juk'an chik tinamit, rija' man jun achike ta nub'ij chi we, man achi'el ta ojer akuchi' yib'e wi, b'enäq rija' chi wij, rija' nutz'et akuchi' yinok wi rin, rija' ruk'wa'n ramaj chi wij, janipe' ramaj nenb'ana' yinel el, achike ramaj ri yinuqa qa, ronojel retaman roma b'enäq chi wij.

Man jun achike ta nub'ij chi we wakamin, roma retaman chi rin man chöj ta ninsäch ri nupeq nuch'akon. Wetaman ninchojmirisaj, taq rija' nutz'et chi manäq nupwaq nub'ij chi we:

—Tachapa' el jun apwaq chi ri' —ncha' chi we taq k'o rupeq rija'. —Xa ja ta k'a la' junan qichin ri' —ke ri' nub'ij chi we.

Ja ri, junan yojsamäj, ja ri nuya' jun b'ey qachuxtaq pa jun wuqu' q'ij, wi k'a k'o na nqajo' chi rukojöl q'ij ja ri rin yib'anon.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike nub'ij ri te'ej chi ke ri ral toq nutz'et chi ri kitata' nq'ab'är?
2. ¿Achike nkiq'axab'ej wi ki' rije' rik'in ri rachijil?
3. ¿Achike rusamaj ri tata'aj?
4. ¿Achike kib'anon che re ri kipwaq rik'in ri rachijil?
5. ¿Achike roma man jun nub'ij ri achin ri nb'ek'ayin ri ixöq juk'an chik tinamit?

CH'OB'ONİK

¿Achike naq'ijuj rat chi rij ri ruq'ijub'al ri ixöq ntzijon chi rupam re jun tzijonik re ye'?

TZIJ UKUSAN CHI RUPAM RE TIJONİK RE YE'

Ya'. Tzam, k'ey; ri ya' nq'ab'arsan.

Ramaj. Mej; jun mej, ri k'atzinel chi awe richin nk'achoj jun asamaj.

Chilab'ej. Peyob'ej; nak'utuj utzil che re jun chik richin nub'an jun asamaj.



RUWUQ TZIJONİK

RUK'ASLEMAL JUN MEB'A'

Ka'i' nujuna' toq xköm ri nute', rik'in nutata' xik'oje' kan. Ri nute' xub'ij che re ri nutata':

—Wakamin ja k'a la ti xtän natz'et kan jub'a', ja k'a la jun nok'an el, ja k'a la ye' natz'et kan rat.

Ke ri' ri nutata' xirilij rin, k'a nintij nutz'um chi ri', ri nutata' xuya' rutz'um wakäx chi we. Rik'in ri nutata' xik'iy wi pe.

Ke ri' xe toq xanimär pe' jub'a', xib'e pa ik' rik'in jun kaxlan rub'i' ya Chawela chi ma Kayetano, xik'oje' chi ri'.

Ri nutata' xukanoj ruka'n nute'. Ri nutata' nub'ij che re ri nuxib'al:

—Wakamin ngak'ayij jub'a' qixim richin nqalöq' ruq re xtän.

Ri ojer rinutata' kexa oxì' raqän q'ab'aj ninkusaj.

—Ütz k'a —ncha' ri nuxib'al.

Xpe ri nutata' xub'ij che re ri ruka'n nute':

—Wakamin ngak'ayij el jub'a' qixim richin nqalöq' ruq re xtän —ncha' che re.

—Ütz wan ri' —xcha' ri ruka'n nute'.

—Na re, k'o ta chik rutzyaq re xtän, xu k'o ta ri nloq'on rutzyaq rija —ncha'.

—Ay!, ütz wan ri' —ncha' che re.

Wakamin ri', xpe ri nata' nub'ij:

—Wakamin xtinb'ij k'a chi awe chi la jun ixöq kaxlan rub'i' ya Chawela, yaruk'utuj pan ik'. Jät pan ik' rik'in, roma rin man xtinlök' ta ri atzyaq, man ninlök' ta'. Rin nintz'et chi man k'o ta chik atz'yaq roma ri' xink'ayij jub'a' qixim richin nqalök' ri atzyaq. Wakamin yab'e pan ik', chi ma Kayetano.

—Ütz k'a —yicha' che re rin roma rin janíla ninrayij yib'e pan ik'.

Ja xpe ri nutata', ja xch'o'n rik'in ri kaxlan ixök' ri', ri kaxlan ixök' xub'ij pe:

—¡Ay!, tak'ama' pe k'a, xa kan ninwajo' ok rija', tpe pan ik' wik'in, tk'oje' wik'in' —ncha'.

Ke ri', ja xiruya' kan ri nutata' rik'in, chi ri' xik'oje' pan ik rik'in, man xixule' ta qa chiik chi wachoch, man chik xib'e ta qa juwil. Rik'in chik nuxib'al wawe' xik'oje' wi, chi ri juwil xik'oje' wi.

Xik'i'y k'a pe ri', toq xpe ri nunimal -k'o jun nunimal ke re Pan Q'än-, toq nub'ij:

—Wakamin xa nb'e chi wij la nuchaq' richin ninwaq'omaj pe, k'a xtinya' na pe ronojel raq'on, ronojel che re k'a ri' xtiye chik wawe —ncha' che re ri nutata'.

—Ütz k'a, xe wi ke ri', ke k'a ri ri' —ncha'.

Ke ri', xib'e qa chi rij, ke ri' ja chik ri nunimal xinaq'oman pe k'a k'a ri' xik'achoj pe ri. K'a ri xipe chik jumül wawe'.

Ketaq ri' xik'oje' kik'in la wali', kik'in rije' xik'i'y wi pe, ke ri' xe toq xk'oje' el nuk'u'x, xe toq xkib'ij el chi we chi yib'e Ixim'ulew, yib'esamäj, k'o jun xril el nusamaj, xib'e Ixim'ulew, xib'esamäj, xe nink'is kan ri wik' ja yipe kik'in la wali' yentutz'eta' kan, yentutz'eta' kan, k'a ri' chik jumül yib'e. Ketaq ri' jantape' yipeteyaj ik', ik', yipe, ja k'a ri nub'anon pe toq xik'i'y pe.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Janipe' rujuna' toq xköm ri rute' rija'?
2. ¿Achike roma man xkilöq ta rutzyaq rija'?
3. ¿Achike roma toq xkib'eya' kan pan ik' rija'?
4. ¿Achike xkik'ayij el toq xkilöq' rutzyaq?
5. ¿Achöj rik'in xk'oje' wi nab'ey b'ey pan ik' rija' toq xb'e pan ik'?

CH'OB'ONİK

Tatz'ib'aj achike ri naq'ijuj chi rij ri ruk'aslem re jun xtän re ye'.

TZIJ UKUSAN CHI RUPAM RE TZIJONİK RE YE'

Jantape'. Junelik, toq man najäl ta ri nab'än, ri asamaj.

Xnimär. Xk'i'y, ja ri' naq'asisaj chi rupam ronojel ri k'aslemal toq k'a at ak'wal na k'a yab'e'ok na jun nimawinäq.



RUWAQXAQ TZIJONİK

RI PIKO'J

Yisamäj rik'in ri jun kaxlan, roma k'ate' xapon qa ri b'lachxutuq achin, ri a Meyel xapon qa jun q'ij, alaxb'äl q'ij chi ri', yimeson pa b'ey, chi ri' ninmäs ruch'i' ri ruk'aj wuj ri; rija' xrajo' xwolöl kan wik'in, rin achib'eyel man xinwak'axaj ta xinb'än che re, xpa'e' pa rutza'n b'ey. Wakamin nub'ij rija' chi we, roma rin xinél pe:

—Wawe' aj k'a at k'o wi —cha' chi we.

—Ja —yicha' che re, —wawe' in k'o wi.

Ke ri' ja xojch'o'n xojtzijon qa, xa xe ri q'ij ri' man k'a wetaman rin ri nub'ij chi we:

—Rin yatinwajo' —ncha' chi we.

—Ay, rat xa man qitzij ta nab'ij, rat xa k'o achöj chi re yach'o'n wi —yicha' che re.

—Wakamin man k'o ta achoq chi re yich'o'n wi, xk'oje' k'a ri', man xtinnójij ta tzij, xe wakamin man jun achike k'o ta pa nuk'aslem —ncha' chi we.

—K'o ke ri' nkib'ij, xa man qitzij ta —yicha' che re.

—Man jun achike ta ninwajo', man jun achike K'o pa nuk'aslem, rin qitzij ninb'ij chi awe, kan qitzij yatinwajo' —ncha' rija'.

—Tab'ana' utzil kinab'ejacha' kan jub'a —yicha' che re.

—Yab'enya' kan, xe tab'ij chi we chi yinawajo' rat —xub'ij chi we.

—Kape chik na k'a junb'ey k'a —xinb'ij che re.

Ke ri' xqaya' chi qawäch janipe' yojtzijon chik junb'ey.

—Yipe Tumingo —xub'ij chi we.

—Ütz k'a —xicha' che re.

—K'a xkinawoyob'ej k'a —xcha' chi we.

—Ütz k'a —xicha' che re rin.

Ke ri xpe ri Tumingo, ke re xinb'ij chi re rin:

—Rin ninwajo' yinel el chi re', roma man ütz chik' ninna' ri in k'o wawe' —yicha' che re.

—Ütz wan ri —ncha' chi we. —Xe wi ke ri' anojin, ke k'a ri ri'. Wi nawajo' yab'esamäj rik'in jun mo's ninb'ij chi re ri akuchi' yisamäj rin, rije' nkikanoj jun aj ik' —ncha' chi we.

—Qitzij, tab'ij che ke k'a, achike na xtikib'ij —yicha' che re.

Ke ri' rija' xub'ij chi re ri mo's, ri mo's xub'ij chi ütz k'a. Rija' xub'ij chi we rin chi ke re' xkib'ij:

—Tak'ama' pe k'a, nqajo' —xub'ij ri mo's.

Ke ri' xiruk'wa'j, xib'e rik'in ri rajaw rija'. Wakamin rija' nub'ij chi we:

—Ütz re xape richin ke ri' jataqil yatintz'et. Yantz'et wi yatziyon rik'in chik' jun —ncha' chi we.

—Achike chik k'a nab'ij rat, man nijamajo' ta nuwäch richin yitzijon, xa k'o wan samaj ri'.

—Qitzij ri nab'ij, xe k'o xtani' ri ke ri' nkib'än.

Ke ri' xik'o ri q'ij, xe toq xub'ij chi we:

—Wakamin xa ja xink'is re nusamaj, xb'e'apon ri q'ij ri aq'ijun, yab'e chöj ke ri chi wij xa man yab'e ta, we man aq'ijun ta yab'e chi wij tab'ij juwil chi we. Roma kan qaq'ijum wi chi yab'e chi wij, wakamin taq'ijuj tanojij ütz ütz ri achike nab'än —xcha' rija'.

Ke re' xinb'ij che re rin:

—Rin yatinwajo', nuq'ijun yib'e chi awij, xe k'a chuqa' ninb'ij chi awe chi rat taq'ijuj ütz, man k'a ri' manäq chik' xkinawajo' ta, man xkik'atzin ta chik' chi awe —xicha' chi re rin.

Ke ri xub'ij ri achin:

—Rin xinq'ijuj yan roma ri toq ninb'ij chi awe, wi xa ta ntz'uk tzij ri', man jun ta ninb'ij chi awe —xcha' rija'.

Ke ri' xinb'ij chi re chi ütz k'a.

—Ri ate' atata' achike k'a nkib'ij ri' —xicha' chi re rin.

—Rije' man jun achike ta nkib'ij roma rin xinb'ij yan chi ke, rije' yojokik'ama'.

Ke ri xb'e'apon ri q'ij chi yojb'e chi rachoch ri a Meyel, ke re' xub'ij chi we:

—K'a xtak'än pe ri atzyaq roma chqijun nqab'än el che re richin nkik'wa'j el ri nute' nutata' —ncha'.

Toq xeb'e'apon ri rute' rutata', xuya' pe ri qatzyaq chi ke. Xik'o jun ka'i' oxi' ramaj k'a ri' xojel pe röj, xojb'e nab'ey pa k'aybäl, xqab'eloq'o' jun nuperaj, xulöq' jun nukol rik'in jun nusut; rija' xulöq' pe jun rupawi', ke ri' xqab'än.

Toq xojb'e'apon chi rochoch ri a Meyel, män ninwajo' ta chik yinok chi rochoch. Ke re' nub'ij chi we:

—Katok apo k'a, achike chik k'a la ke la ri'.

Rija' rub'in chik chi ke ri rute' rutata' chi tkib'ana' apo jub'a' qachuxtäq. Toq xojok apo ri', nub'ij ri walite':

—Xixpe.

—Ja' —xcha' rija'.

—Kixok pe k'a —xub'ij ri rute'.

—Matyox ok chi awe —xicha' che re rin.

Ke ri' xkiya' pe nuch'akat, xkiya' pe nurikil, xojwa' qa; ke ri xqab'än.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike rub'in ri achin nch'o'n che re rija'?
2. ¿Akuchi' xketamaj wi kiwa rije'?
3. ¿Achike rusamaj ri xtän ntzijon wawe'?
4. ¿Achike xkitzijo' rije' toq xketamaj kiwäch?
5. ¿Achike rub'eyal toq xb'e rija' rik'in ri ala' yech'o'n wi?
6. ¿Achike xub'än ri ralite' toq xeb'e'apon chi rachoch ri ala'?

CH'OB'ONİK

Tab'ij achike naq'ijuj chi rij re rub'eyal re toq xketamaj kiwäch rije'.

TZIJ UKUSAN CHI RUPAM RE TZIJONİK RE YE'

Piko'j. Tzijonik, chob'onik chi kiwäch ri xtani', kik'in ri alab'oni'.

Riki'l. Q'utu'n, ja ri ruki'il ri wäy, ronojel wa'in, ichaj, ti'ij, kinäq'.

Nwolöl. Tzijonik, tzij nub'an jun ala' richin nq'olon rik'in jun xtän.



RUB'ELEJ TZIJONİK

RI RURAYB'ÄL JUN XTÄN

Wakamin rin rik'in ri tijonik nya'öx chi we ninna' chi k'o ützt etamab'äl ninwül, ja ri' nurayb'äl taq xkib'echojimir, taq xkib'e'ok nimawinäq richin ninwül jun ützt k'aslem. Ri nurayb'äl rin ja ri' yento' ta ri meb'a'i', rin chuqa' xa in meb'a'.

Ri nurayb'äl rin ja k'o ta jun q'ij, ri man ketaman ta nkitz'et ruwa wuj xtiketamaj ta nkisik'ij ruwa wuj. Rin ninrayij yik'oje' ta chi ruwäch jun nimajay, chi kiwäch jun molaj winaqi' richin ta yich'o'n kik'in, richin ta ninya' jun ka'i' oxi' na'oj tzij pa kiwi', yojtzijon ta kik'in chi rij ri etamab'äl, chi rij ru rutz'etik ri ruwa wuj, nintzijoj ta jub'a' jun ka'i' oxi' na'oj chi ke.

Toq xtib'e chik apo jub'a' q'ij chi nuwäch, k'o jun nurayb'äl rin, ri nurayb'äl ri' ja ri nink'is ri etamab'äl richin yento' ri nuchaq' k'a e k'o na kan chi wij, roma rije' k'a e ko'öl na, xa k'a jub'a' tkichöp el tijonik.

Ri nurayb'äl ja ri ninya' to'ik, rin ja ri' ninwajo'. Chuqa' nurayb'äl rin ri yik'oje' chi kiwäch winaqi', yentijoj ta taq xtinwelesaj ri nutijonik.

Rin we xtinwül achike xtinb'än richin xkiq'ax, ri Ajaw chi la' chi kaj xkiruto' ta rik'in ri nuto'ik xtkiy'a ri nute' nutata' richin xtinwelesaj ri wetamab'äl. Chuqa' rin ninrayij yib'e pa etamab'äl akuchi' ta ntzijöx ruch'ab'äl ri Ajaw ri k'o chi la' chi kaj.

Roma na wi man jun ta achike ta chuxtäq, man ta nq'ax chi qawäch, man nchojmür ta. Chuqa' ri nurayb'äl rin ja ri yib'e ta akuchi' yatijöx rik'in ützt taq tzij richin ke ri' nya'öx ützt pixab'anik chi we, richin nachojmirisaj awi', richin chuqa' yatok ta jun winäq ri k'o ruq'ij.

Rin nurayb'äl chi rupam re jun ka'i' oxi' juna' petenäq, ja ri nink'is ta ri wetamab'äl nuchapon. Chi rupam re jun juna' re', jani ta na xinrayij ke ützt yinel chi rupam re wetamab'äl richin ke ri' ri chuxtäq ri man ta nchojmür, yitikür ta ninchojmirisaj, richin ke ri ninwetamaj ta k'iy, richin man jun xkib'etzäq. Roma ri' ri nurayb'äl rin ja ri yento' ri meb'a'i'.

Wakamin k'ayew jub'a' ninna' ri tijonik nink'ül, rik'in jub'a' man kan ta janipe' ruk'ayewal, xa jub'a' nunojib'al ninwajo'. K'o ka'i' tijonik man kan ta nq'ax chi nuwäch, nurayb'äl k'a xkench'äk re ka'i' tijonik re', xtinya' k'a yalan nuk'u'x rik'in richin xkitikür xtinch'äk; roma ja re nurayb'äl rin ri nuchapon.

E k'o chuqa' e ka'i' taq nuchaq' e b'enäq pa tijob'äl, rije' e k'o pa nab'ey juna'. Ri nurayb'äl chi ke rije' ja ri nb'ekila' ta achike ri nurayb'en apo chi nuwäch rin, nb'ekila' ta rije' ri ützt taq na'oj, nketamaj ta rutz'etik ri wuj, yechojmür ta pa kik'aslem.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike nurayb'äj ri xtän wakamin?
2. ¿Achike nurayb'ej ri xtän toq xtib'erelesaj ri rutijonik?
3. ¿Achike nurayb'ej ri xtän chi ke ri taq ruchaq'?
4. ¿Achike nurayb'ej ri xtän kik'in ri meb'a'i'?
5. ¿Achike roma nunojij ri xtän chi k'ayew jub'a' nub'än chi ruwäch ri tijonik?
6. ¿Achike nrajo' nb'erila' ri xtän rik'in ri tijonik nub'än wakamin?

CH'OB'ONİK

Tatz'ib'aj achike naq'ijuj chi rij ri rurayb'äl re jun xtän re ye'.

TZIJ UKUSAN CHI RUPAM RE TZIJONİK RE YE'

Pixab'anik. Utziläj taq na'oj nya'öx koma ri winaqi' taq e ri'j chik, re na'oj re' chuqa' nkiya' ri te'ej tata'aj.



RULAJUJ TZIJONĪK

RI NUK'ASLEM OJER

E yo'x ri ak'wala' xek'oje' toq xkōm ri nute'. E k'o ch'aqa chīk wach'alal e kamināq el; xe ōj ka'i' rik'in la nuxib'al xojk'oje' kan, junan qate', junan qatata'. E k'o ch'aqa chīk nuxib'al xe man junan ta ri qate', ja k'a ri' nq'axon chi qe janipe' xojk'i'y pe.

Rin man ninna' ta toq xkōm ri nute', roma k'a in ko'öl chi ri', toq xkōm rija' xik'oje' kan jun ka'i' oxi' rik'in ri watit. Toq ri qatata' xukanoj ruka'n qate' xojk'oje' jub'a' kik'in rije', taq xeq'ax ri q'ij, ri qaruka'n qate' xojroqotaj el, rin xib'e pa ik', wo'o' rukak'al taq pwāq xinch'āk ri jujun ik'. Chi ri' ntij kināq', ri kināq' jun utzilāj q'utu'n, chuqa' nkitij ti'ij, nkitzik ri ti'ij, nkisa'. Ninnojij rin ri kināq' man junan ta ruki'il achi'el ri kināq', ri kināq' kan yalan wi ütztitij. Pa wachoch rin xe nqatij ri tzayin ya', q'utun ik, ichaj; ja ri' nqatij.

Ri akuchi' yisamāj wi, ronojel ninb'ān, nixōj ri tz'o', ninpon ri wāy, yimeson, ronojel ninb'ān; xiyalōj xisamāj rik'in ri kaxlan ixōq, rija' yalan xirajo' roma ri ninxik' wi. Jun q'ij ri', jun chīk ixōq xub'ij chi we:

—Kape wik'in rin roma wawe' man naxōj ta tz'o', xe jujun taq samaj nab'ān, nab'eya' ake'en, wi xkape nintoj lajuj rukak'al manq'uq' ri jun ik' chi awe'.

Roma numunil chi rij jun chīk wo'o' taq manq'uq' xinēl el ri ri akuchi' yisamāj wi, xib'e rik'in ri jun chīk kaxlan ixōq, chi ri' chuqa' junan nintij.

Ke ri' toq xik'i'y pe xib'e rik'in la wichib'il, rik'in rija' junan xinb'ān pe, xintz'ila' wi roma nkiqej kocho ri.

Ja k'a toq xb'an oyowal pa tinamit ri' xekamisāx k'i'y wināqi', man jun chīk achin xtzetetāj wawe', e k'i'y xekōm, jujun achi'a' xkewaj ki' ja ri' ri man xekōm ta, ri wichib'il xrewaj ri'.

K'a ri xojb'e pa xulan qa, pa taq'aj, chi ri' xojb'e wi, chi ri' xya'ox qasamaj, rusamaj ri wichib'il ja ri nuch'ojch'ojirisaj kape, ja ri' nkisamajij, rōj ri ixoqi' yeqilij ri achi'a' yeb'e'apon qa, nqab'ān kiway. Ri jujun ch'ay kiwa'in nqaya' ka'i' etab'al chi ke jujun achi'a', oxi' taq pwāq nqab'anb'ej wi ri jujun ch'ay wa'in.

Yojyakatāj pa oxi' ramaj nimaq'a', ke ri' nqaxoj ri tz'o', k'a ri' yojponon qa, pa wo'o' ramaj xojk'achoj yan. Ke ri' xqab'ān ri wo'o' rukak'al juna', ke ri' xqab'eb'ana' ri pa xulan. Roma k'a ri' janila xqatzila' qi', k'a ri' xojtzolin pe jun b'ey chīk wawe'.

Ke ri' xojosamāj chīk re wawe', wawe' xqijun rajaw ri samaj. R. achoq rik'in nisamāj ri wichijil, jun q'ij xub'ij che re:

—Nink'ayij jun k'an awulew —ncha' che re.

Ke ri eqal xulöq' kan ri wichib'il ri jun k'an ulew, xa ke ri' taq xojk'oje' jun xti ruxil qaxoral, eqal eqal xqalöq' kan jun xti ruxil ulew.

Kan nub'ananäj ri wichib'il xb'eyawäj pe chi nuwa, richin nqaq'axab'ej qi' xinb'ana!a' nukem, xinb'anala' nukem roma xb'eyawäj ri wichijil. K'a ri' xib'eyawäj chik rin, roma ri' ninb'ij rin chi xa xojtz'olin chi kij re'.

Rin ninb'ij chi wakamin ütz b'a ri k'aslem chi qawäch röj. Ojer xa nqalöq' qixin, man yojrub'än ta, man k'o ta qapwaq.

Taq xqak'äm pe qi' rik'in ri wachijil yalan xojсамäj, man yojwa' ta ütz kik'in ri xtaq wal. Roma ri' xb'eyawäj ri wichib'il chuqa' ri ak'wala'. Wakamin ütz b'a. Wakamin wi k'o asamaj chi q'ij pa kaji' wo'o' ramaj xatzolin pe, wi xa asamaj rat, awichin rat, yatzolin pe achike ramaj nawajo' rat.

Toq xojb'e pa xulan xqaya' kan ri qasamaj, ri qach'alal, ri qab'anikil, ri qawinaq. Kayew ruk'aslem jun winäq mayab'. Wakamin ri winaqi' man kan ta yeb'e chik pa taq xulan roma xq'ax chi kiwäch chi ri k'aslem k'ayew jub'a' xe man kan ta achi'el ri pa taq xulan, pa taq'aj.

Ri k'aslem wakamin xujel jub'a' ri' chi ke ri winaqi' ri xetikir xkik'ül jub'a' tijonik, xkib'än jalajöj taq samaj, chuqa' ch'aqa chik na'oj. Re winaqi' re' xa e jub'a' ok. Konojel b'a' ri winaqi' mayab' k'a k'ayew na ri kik'aslem. Ri winaqi' ri xujel jub'a' ri' ri kik'aslem tz'aq rupam ri kocho, tz'aq ruxe', ch'ich' ruwi'. Ri ch'aqa chik winaqi' ri e k'o pa juyub'äl k'im ruwi' ri kocho, patz ri ruxe', ulew rupam, man k'o ta kipwaq.

Ri winaqi' nkib'ij chi we rin:

—Man q'alaj ta chi k'o chik lajuj rukajk'al ajuna' —yecha' chi we, roma k'a in ak'wal na in kitz'et.

Rin man kan ta xiyawäj, man kan ta achi'el xub'än ri wichib'il. Man roma ta k'a xintz'ila' pe wi' yalan ta xiyawäjxe, manäq; man xiyawetaj ta roma chuqa' kan xinwilij wi wi', k'o xintij, ri akuchi' xik'oje' chi ik' kan k'o wi ri xintij roma ri' kan k'o b'a' wuchuq'a'.

Ri wichib'il janila xsamäj, man jun kan ta k'a xrilij ri' roma laq ri' kan yalan nyawäj, yalan chik ri'j ntz'et chi nuwa rin; rin xek'oje' waqlajuj wal, lajuj ri xeköm, waqi' ri e k'äs. Ja ri' qak'ulwachin pe kik'in la wach'alal, yalan nqaq'owsaj b'is, nqatzila' qi'; wakamin qayon chik öj k'o, xojel pe pa qaxoral ri akuchi' öj k'o wi, xojq'ax pa tinamit rik'in la jun wal ala'.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike ri utziläj rikil nb'ix chi rupam re tzijonik re ye'?
2. ¿Achike nab'ey rsamaj xril ri ixöq?
3. ¿Akuchi' xeb'esamäj wi ri ixöq chuqa ri rachijil toq xb'anatäj ri oyowal pa kitinamit?
4. ¿Achike samaj xub'än ri ixöq pa taq'aj?
5. ¿Achike roma toq nub'ij ri ixöq chi k'a ak'wal na ntzu'un chi ruwäch ri rachib'il?
6. ¿Janipe' ral xek'oje' ri ixöq?
7. ¿Janipe' ral xeköm ri ixöq?

CH'OB'ONİK

Tatz'ib'aj achike naq'ijuj chi rij ri k'aslem ntzijöx wawe'.

TZIJ UKUSAN CHI RUPAM RE TZIJONİK RE YE'

Stape'. Ja ri toq man üt, man ja ta qitzij rub'anikil ri nab'an che re.

Tz'aq. Kowläj taq xan, jay b'anon chi ab'äj.

Wichib'il. Jun winäq nk'oje' rik'in jun chik, kachib'il ki', jun ixöq rik'in jun achin.

Qocho. Qachoch.

Yo'x. Nb'ix ke ri' chi ke ka'i' ak'wala' taq pa jun b'ey ye'aläx.



RUJULAJUJ TZIJONİK

RI KIKOTEMAL NKIYA' RI AK'WALA'

Waqxaqi' wal xek'oje', e ka'i' xeköm. Ri jun k'a ti nene' taq xköm, taq xköm man kan ta xinna' roma oxi' ok q'ij xk'oje' wik'in, achike la ri xok che re, man xinwetamaj ta achike roma xköm el. Ri wal ri' man jun xinna' ta taq xköm el.

Ri jun chik xti wal ala', re wal re' xnimär yan pe, rija' ntikir chik nuto' ri rutata' pa samaj. Kan ke ri' wi ri xtaq alab'o', nkito' ri kitata' che re ri kisamaj: nkib'än awex, xa b'a chike kisamaj nkib'än, nkich'äk' xti kipwaq. Ri xtaq wal rin nkilöq' chik kichuxtäq, k'o re' nkiya' pe jub'a' nupwaq richin ninb'än nuloq'oj, roma ri' man kan ta ninna' ri nqaq'axaj qi', yojkito' chik rik'in ri qameb'äl.

Toq e koköj na ok ri ak'wala', k'a ja na rat k'o chi natz'et achike nab'än che re ri aloq'oj, nakanuj ri apwaq. Toq nim chik jun ak'wal ntikir jub'a' yeruto' ri kite' kitata'. Yalan juwil xqana' toq xköm ri jun ti k'ajol. Ri e k'o wakamin yeb'e chi q'ij, eqal nqaq'axaj qi', yikikot kik'in re taq wal.

Yeb'e ta re taq wal chi nuwa rin, yiköm roma nub'is, roma ri' toq man ninwajo' ta yeb'esamäj näj. Ri ak'wala' nkib'ij chi yeb'e pa nimatinamit, nkajo' yeb'esamäj chi ri', ja ri nkirayij rije', xa ja k'a ri rin man ninya' ta q'ij chi ke chi yeb'e. Rije' chuqa' nkinimaj nutzij, nkinimaj ronojel ri nb'ij chi ke, man e itzel ta ak'wala'. K'o ak'wala' ri man nkinimaj ta tzij, man e ütztä, roma ri' k'o winäq ri nkib'ij chi k'o ak'wala' ri man achike tab'än chi ke kan ja ri nkib'än ri achike nkajo' rije'. Re wal rin man ke ta ri chi kiwa.

Re wal kitz'eton pe achike nuq'axan pa nuk'aslem, ronojel ri k'ayesal nuq'axan chuqa' rije' kilon pe, roma laq ri' e utziläj ak'wala', nkinimaj nutzij.

Kaji' taq alab'o', ka'i' xtani' ri wal e k'o, chi konojel e waqi'. Ka'i' juna' kikojol ri wal, xek'oje' chanin. Taq jub'a' kikojol ri ak'wala' k'ayew jub'a', natz'ila' awi'; achike xtab'än k'a xe wi ke ri' ke ri', roma ri' ninb'ij chi ke la ak'wala':

—Tinimaj tz'ij, man tib'än ri man ninimaj ta tzij, roma ke ri' man ütztä, tinimaj tz'ij roma röj qetaman chi ke ri ütztä chi ke ri man ütztä, rix xa k'a re yixnimer pe, jani achike ta iwetaman, man iwetaman ta achike ruk'ayewal ri k'aslem, röj re janila qaq'axan pe.

Ri nute' k'i'y na'oj xub'ij xusipaj chi we, rin xinnimaj pe rutz'ij, matyox che re ri Ajaw ja re' in k'o pe wakamin; roma ri' rix tinimaj qatzij achike ri ütztä nib'än che re ri ikaslem.

Ri te'eja' janila nkiq'ijuj pa kiwi' ri kal, achike xtab'än xe wi man nkinimaj ta atzij, wi k'o man ja' ta nkib'än chi awa k'o chi ye'akoch' roma kan awal wi

k'a ri', man xtawoqotaj ta el. Toq ke ri chuqa' nab'än chi ke xa k'ayew nkib'än chi awa.

Jun te'ej jantape' nq'axon ruk'u'x chi kij ri ral, roma xu kan ral wi k'a ri'. Roma ri' ninb'ij rin chi k'o winäq ri man k'o ta kal, nkirayij jun. Achike xtab'än, xe wi man k'o ta awal, stape' narayij yek'oje'.

Roma ri', röj re k'o qal, keqajo'. K'o winaqi' ri yekoqotaj el ri kal pa taq kocho, man yekajo' ta chik. Ri ke re' nab'än man üt, man üt nqab'än ke re chi ruwa ri ruwach'ulew.

Ninb'ij rin chi k'atzinel yek'oje' re ak'wala' roma koma rije' chuqa' ri Ajaw yarutewuchuj, ja rije' ri nkiya' akikotemal, stape' k'a yenaqalon ki' ri nkiya' kikotem pa awachoch. Wi yab'ison ta koma rije' yakikot jun b'ey chik, nkich'uch'ursaj ri ak'u'x, koma rije' man nawajo' ta yaköm, stape' janila ri ak'ayewal koma rije' yawa' chik qa... taq e k'o ak'wala' pa jun ach'alal ri'il man jun nimalin pa qocho.

Roma ri' ninb'ij chi k'o chi yek'oje' awal. Rin ninrayij chi ke ri wal üt xtikib'än chi ruwach'ulew, man ta xtikit'ila' ki' achi'el re xintzila' pe wi rin. Richin nkil jun utziläj kik'aslem k'o chi yesamäj, naya' kina'oj, nak'üt jun ch'ajch'ojläj b'ej chi kiwa.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Janipe' kijuna' ri ak'wala' toq nkichöp samaj?
2. ¿Achike to'ik nkiya' ri ak'wala' chi ke ri kite' kitata'?
3. ¿Achike nkajo' ri te'ej tata'aj pa kiwi' ri kajk'wa'l?
4. ¿Achike rub'anikil toq nkiya' kikotem ri ak'wala' chi ke ri kite' kitata'?
5. ¿Achike' roma nub'ij ri ntzijen chi k'o chi yek'oje' ri ak'wala'?
6. ¿Achike kib'anikil ri ak'wala' xetzijöx kij chi rupam re jun tzijenik re'?

CH'OB'ONİK

Tatz'ib'aj achike naq'ijuj chi rij re jun tzijenik re ye'.

TZIJ UKUSAN CHI RUPAN RE TZIJONİK RE YE'

Junelik. jantape'.

Leq. Ja ri' nuq'ajuj rik'in jub'a'.

Janila. Janina', kiy. Toq jun chuxtäq nimaläj rub'anikil.

Stape'. Toq man ja' ta nub'än jun a chuxtäq nakoch' awa rik'in juni chik.



RUKAB'LAJUJ TZIJONĬK

RI K'ATZINEL NK'ÜT CHI KIWA RI AK'WALA'

Jun ak'wal janina k'atzinel nk'üt chi ruwäch ri ütz taq na'oj, ronojel k'a re na'oj re' xtik'atzin pa ruk'aslem richin ke ri' taq xtik'iy rija' ütz b'ey nuk'wa'j el. Jun ak'wal ri ronojel nk'üt chi ruwäch, nuya' ruq'ij ri retamab'al, man jun chik nelesan pa rujolom. Ronojel k'a ri xtretamaj janina xtk'atzin che re pa ruk'aslem.

Taq jun ak'wal man nya'öx ta pa tijonik, re jun ak'wal re' taq nk'iy pe we nril jun samaj rik'in jub'a' man nya'öx ta che re roma man q'axnāq ta pa etamab'äl, roma ri' k'atzinel nya'öx pa tijob'äl jun ak'wal richin retamab'al, richin ke ri' nk'iy rik'in jun rutzilāj k'aslem chuqa' ütz runa'oj.

Chuqa' nqajo' nqab'ij chi ke ri uk'wayöl taq b'ey, ri q'atöy taq tzij, nkikanoj ta achike nkib'än richin ta k'o kitzyaq ri ak'wala' ri manāq akuchi' nkib'ek'ama' pe. K'iy wināq pa taq juyu' e mestan kan, man jun achike ta nkik'ül, rije' man yetikir ta ye'el pe roma ri b'ey janina k'ayew, ri ch'ich' man nb'e'apon ta kik'in, rije' yekanāj kan chi ri' pa taq kachoch, e mestan kan jumül.

K'o k'a ak'wala' yeqatz'et e tz'il tz'il, xa koma ta k'a rije' ri uk'wayöl taq b'ey npe ta jun nojib'äl kik'in richin ta yekito' chi konojel, yikito' ta ri winaqi' aj pa q'ös e mestan kan, k'o ta jun achike nb'an richin yeto'öx jub'a' richin kitzyaq, kiway, richin ketamab'al.

Roma manāq ketamab'al ri ak'wala' yeq'ol el. Chi rupam re q'ij wakamin janina k'iy man ütz ta nqatz'et, achi'el ri kamisanela', ri eleq'oma', ch'aqa chik. K'o wināq man ütz ta kina'oj nkiya' kina'oj ri ak'wala, ja k'a ri ak'wala' nkib'ij:

—Ütz k'a.

—Tib'ana' re re', —yetaqchi'x ri ak'wal:

—Ütz k'a —yecha' rije'.

Ke re' nkib'än ri ak'wala' roma rije' man nya'öx ta ri ketamab'äl. Nb'an chi ke achi'el man jun kiqu'ij. Jun ak'wal janina ruq'ij, roma k'a ri' k'atzinel nya'öx ta che re ri ak'wal ri etamab'äl richin man nq'olotāj ta. E k'iy man nkik'ül ta etamab'äl, yeq'olotāj el koma ch'aqa chik winaqi' roma ri' rije' man juu achike ketaman, ri achike nb'ix chi ke ja ri' nkib'än.

Ri yalan yeq'olotāj ja ri aj pa juyu', roma nsuj kipeq, janina nb'ix chi ke, rije' nkichöp el ri b'ey nya'öx chi kiwäch.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike roma k'o chi nk'üt chi kiwa ri ak'wala' ri ütz taq na'oj, taq b'anob'äl?
2. ¿Achike ri k'atzinel yenojin ri kik'ayewal ri ak'wala' richin ütz nkib'än?
3. ¿Achike winaqi' ri janíla e mestan?
4. ¿Achike ri k'atzinel richin man yeq'olāj ta ri ak'wala'?
5. ¿Achike ri k'atzinel richin man yemestāx ta ri winaqi' kitz'ilon ki'?

CH'OB'ONİK

Tatzijoj achike naq'ijuj chi rij re jun tzijonik xsik'ix chi kij ri ak'wala' wawe'.

TZIJ UKUSAN CHI RUPAM RE TZIJONİK RE YE'

Pa q'ös. Pa juyu'.

Peq. Pwäq, nk'atzin richin nab'än aloq'oj.



ROXLAJUJ TZIJONĪK

RI K'OY

Ri ojer taq winaqi' kitz'eton pa jun juyu' jun chiköp rub'inib'an k'oy. Ri winaqi' ojer xe chi kaqän yeb'yaj wi roma manäq ch'ich'; man achi'el ta wakamin k'o chik ch'ich', ri ojer ri' kan xa xe chi kaqän yeb'yaj ri winaqi', taq nkichöp b'inen pa b'ey richin yab'e pa tinamit, yekik'wa'j kikej, yeb'ek'ayin chi ri'. Richin yab'e'apon pa tinamit, k'o chi yatik'o chi ruchi' jun siwan, chi ruchi' ri siwan ri' chi ri' kitz'eton ri winaqi' noqa el jun chiköp rub'inib'an k'oy. Ri winäqi' nkitzijo' chi ri k'oy achij.

Nb'ix chi jun b'ey jun achin xb'ek'ayin pa tinamit, ruk'wa'n ri rixjayil. Taq e b'enäq pa b'ey, chi runaqaj ri siwan, k'a xkina' xoqa' el ri k'oy chi kij. Xpe ri k'oy ri' xuk'än kan ronojel ri kichuxtäq kik'wa'n richin nkib'ek'ayij. Ri k'oy man xa xe ta ri chuxtäq xuk'än kan chuqa' xuk'än kan ri rixjayil ri achin. Ri achin xutzeqelb'ej el ri k'oy richin nuköl kan ri rixjayil, ke ri' xb'e chi rij. Taq ri k'oy xunab'ej chi ri achin b'enäq chi rij, xuxil kan chi ixk'äq, xusok kan; ke ri' ri achin xkanäj kan, xuxib'ij ri', man xtikir ta xuköl kan ri rixjayil, ri k'oy xuk'wa'j ri ixöq.

Ri k'oy xuch'elej el ri ixöq pa k'echelaj akuchi' k'o wi ri rachoch, xb'eruya' pa jun jül.

Xtzolöj pe ri achin, manäq chik ri rixjayil ruk'amon pe, xuqa qa chi rachoch ri achin manäq chik rixjayil, noq' roma xb'e kan ri rixjayil, man xb'erub'ana' ta chik ruk'ayij. Ri achin rik'in juley chik rach'alal xkib'ek'anj ri rixjayil, xkib'ek'anj ri akuchi' xuk'än kan ri k'oy.

Ri k'oy ruya'on ri ixöq chi ruwäch ri siwan, taq nkanux ri ixöq koma ri rach'alal, ri k'oy yerutzu' pe, man jun nq'an richin man ntz'et ta el. Nik'aj q'ij xkanux ri ixöq, xe man xkil ta pe roma man jun xkil ta akuchi' k'o wi rachoch ri k'oy, man jun xkitz'et ta.

Xq'ax ri q'ij, ri ik', ri juna'. Nb'ix chi ri ixöq xb'ek'oje' xtaq ral, ri xtaq ral ri ixöq kiyon xtaq k'oy yetzu'un roma kan ke ri wi ri' ri kitata', achi'el k'a ri tata'aj ri' ke ri' ri xtaq ak'wala' xek'oje', kiyon taq k'oy. Ri ixöq pa juna' xk'uje' chi ri' rik'in ri k'oy.

Jun cha q'ij ri' juley winaqi' nkikanuj kisi' chi rupam ri siwan akuchi' k'o wi rachoch ri k'oy. Taq xkak'axaj ri winaqi' achike la ri nuräq pa ruchi', nsik'in, —ächike k'a ri'? —xecha' rije'ütz. Taq xkitz'et xa jun k'a ixöq ri nsik'in pe pa jun jül chi ruwäch ri siwan:

—Ja rin tat tat, kinito' jub'a', kinik'wa'j' —ncha' ri ixöq.

—Achike k'a nab'än wawe' —xecha' ri winaqi'.

—Manäq k'a ri táta, xa jun k'oy in k'amayon pe, wakamin yich'ujir yan wawe' roma xa rik'in chiköp in k'o wi —xukamluj ri ixöq.

Taq xkitz'et ri winaqi', chi ruxkin ri ixöq e k'o jun molaj ak'wala', xa xe k'a kiyon taq e k'oy ri kipaläj. Ke ri' ri ixöq xihöp oq'ej chi kiwäch ri winaqi', man nrajo' ta chik nik'oje' kan. Ri winaqi' xkik'utuj che re:

—¿Akuchi' k'o ri k'oy?

—Wakamin b'enäq k'utüy qaway, ja ri e ruchajin ri winaqi' chi ruch'i' taq b'ey. Ri winaqi' wakamin xa man yeq'ax ta chik ke taq re' roma xa b'aj nxib'in pa taq b'ey; nuk'utuj ruway, wakamin ja ri b'enäq.

—¿Nb'eyalöj taq nb'e rija' chi ruk'utuxik ri iway? —xkik'utuj ri winaqi' che re ri ixöq.

—Ja', nb'eyalöj, nb'erub'ana' laq jun ka'i' oxi' ramaj pa taq b'ey, k'a k'o na nril pe k'a ri npe, wakamin man jani tzoloynäq pe —xcha' ri ixöq.

Xepe ri winaqi' ri' xkib'ij che re:

—We rat yatikir yatanimäj, jo' k'a ri', tqachapa' yan b'ey wakamin, kan aninäq jo' —xecha' rije'.

Ri winaqi' xkik'an pe ri ixöq roma xkijoyowaj ruwäch. Ri ixöq ri' man jun rutzyaq rukusan, xa matyox k'a ri winaqi' ri' kik'walon ruxil xtaq tzyäq ja ri' xkiyala' pe che re. Ke ri xepe rije', xkichöp pe b'ey. Man npalb'etäj ta chik ri b'ey chi kiwäch ri e petenäq.

Näj chik kiyo'on kan ri k'echelaj, aninäq e petenäq, —wakamin yojb'e'apon yan —yecha' cha rije'.

Taq ri k'oy xtzolin chi rachoch, man jun chik xuwil ri ixöq, ke ri' xuchöp rukanuxik. Ri k'oy roma xa chiköp, chanin nb'iyin, nuseqela', nuseqela' kaqän ri winaqi' petenäq.

Ri winaqi' kichapon pe b'inen, xkil pe jun ruwajuyu', e q'itajnäq chik rije' roma ri ixöq man ntikir ta chik nib'iyin aninäq. K'ate' xkina' rije' xeb'eruqi' ri k'oy. Xe ok yan chi rupam ri tinamit taq xeb'eruqi' ri k'oy, xpe ri k'oy ri' xuch'elej kan ri ixöq chi kiwäch ri winaqi', ke ri xb'e chik kan jun b'ey ri ixöq, man xetikir ta chi rij ri ixöq, ri ixöq noq' xb'e kan. Ri achi'a' man jun chuqa' achike xkib'an roma itzel chiköp ri k'oy, nkamisan.

Ke ri' achi'a' xkiya' rutzijol pa tinamit ri xkitz'et, ronojel k'a ri tinamit xkiya' chi kiwäch richin nkib'ekanuj ri ixöq. Pa jun nimaq'a' xeb'e' b'ama ronojel ri tinamit xeb'e. E k'iy winäq xeb'e roma ri chiköp kan itzel, nkamisan. Taq xeb'e'apon pa siwan, k'o ri ixöq chi ri'. Ri achi'a' xek'oje' chi ruch'i' ri jül, kewan ki' chi ruch'i' ri jül k'a xel na el ri k'oy. Ri achi'a' nkib'ij chi we xtb'e chi kij, nkikamsaj.

Koyob'en chi ri'. Jun yan mama' ramaj kek'oje' chi ri' taq xel el ri k'oy, xb'e ri k'oy. Kan xe xel ri chiköp, ja ri xe'ok apo ri achi'a', xkib'ek'ama' pe ri ixöq, ja ri xkik'an pe pa tinamit. Man npalb'etäj ta chik ri kib'ey chi kiwäch, ntijöx k'a.

Taq xb'e'apon ri k'oy chi rachoch manäq chik ri ixöq, man jun chik ri ixöq, xe chik ri ak'wala' e k'o kan. Ja ri xuchöp oq'ej ri chiköp, janina noq'. Ke ri ri chiköp xuchöp pe b'inen pa tinamit richin noruk'ama' qa ri ixöq, nuseqesa' nuseqesa' raqäqn ri ixöq peteneq

Taq xuqa qa pa tinamit, ri chiköp xuchöp rukanuxik ri ixöq, xe k'a man xril ta chik, janina noq' kojöl taq jay, nub'än ruq'ab'al chi ja ri ixöq nukanoj, man ntikir ta nch'o'n, xe ntikir nub'än ruq'ab'al, janina noq' ri k'oy. Ri winaqi' ketaman chuqa' chi ri nub'än ri chiköp man ütztä, roma ri' man xkib'ij ta che re akuchi' rewan ri' ri ixöq. Ri k'oy nutijk ruq'ij nukanoj ri ixöq, man xril ta pe, ja ri xtzoloöj pa k'echelaj.

Ri winaqi' chuqa' man xkikamsaj ta, xa chiköp k'a ri xe man xkikamsaj ta, roma xkijoyowaj ruwäch. Ri k'oy janina nuroq'ej ri ixöq roma xanimej pe rik'in.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'


1. ¿Achike nkikusaj ri ojer taq winaqi' richin yeb'e juk'an chik tinamit?
2. ¿Achike roma yeruq'et winaqi' ri k'oy toq nkib'eb'ana' kik'ayij?
3. ¿Achike roma man xtikir ta ri achin xuk'än kan ri rixjayil pa ruq'a' ri k'oy?
4. ¿Achike kib'anikil ri ak'wala' xek'oje' rik'in ri ixöq toq xek'oje' xtaq ral?
5. ¿Janipe' mul xkajo' ri winaqi' xkiköl ri ixöq pa ruq'a' ri k'oy?
6. ¿Achike rub'eyal xkib'än pe ri ruk'isib'äl mul toq xkib'ek'ama' ri ixöq?
7. ¿Achike xub'än ri k'oy toq xb'ek'an pe ri ixöq chi ruwäch ri ruk'isib'äl mul?
8. Achike roma ri winaqi' man xkikamsaj ta ri k'oy.

CH'OB'ONİK

Tatz'ib'aj achike naq'ijuj chi nb'e'el re jun tzijonik re ye'.

TAQ TZIJ XEB'IX CHI RUPAM RE JUN TZIJONİK RE YE'

Ruq'ab'al. Ri nkib'än ri winäq manäq kich'ab'äl, rub'eyal richin nab'ij ri nawajo' rik'in ri q'ab'aj.



RUKAJLAJUJ TZIJONĪK

RI RUK'ATZINEL RI YA'

Wawe' pa qatinamit manäq ya', roma ri' yalan yojtjon poqon. Nqab'ij chi k'ayew roma nqatz'et chi wawe' pa qatinamit jun q'ij k'o, jun q'ij manäq ri qaya'. We manäq ya' manäq chik yojuk'ya' ta, manäq chik nb'an ch'ajo'n, manäq chik nqab'än raq'omal qatiko'n. Ri ya' ja ri' ri k'atzinel chi ruwäch ri k'aslem, kan nk'atzin we chi qichin; junan rik'in qaway, we manäq ya' manäq richin nach'äj aq'a', manäq richin nab'än aq'utu'n. Man nakoch' ta janipe' q'ij man naqüm ta aya' ja ri yakom, roma ri' yalan ruq'ij ri ya'.

Ri ya' janina nk'atzin, we k'o taq achikopi' ütz ye'ak'wa'j pa raqän ya' richin naya' kiya' achi el taq qawakx, taq qakej. Roma k'a ri' ri ya' janina k'atzinel, manäq ya' yaköm, roma xa ja re ye' nk'atzin chi qe röj richin nqaqüm, nqab'än jub'a' raq'omal qatiko'n. We manäq ya' yeb'echikopir qatiko'n.

Atikon awichaj, atikon awawän, man nab'än ta raq'omal yejopojo' chikopi' chi rupam, ye'ok chikopi' chi rupam, man nk'ayitäj ta chik taq awichaj, nk'aq kan chi awäch roma ruyon jut rupam. Chuqa' ri ya' nk'atzin richin nch'aj qatzyaq, richin yojatin, richin nqajosq'ij qi', ja ri' nk'atzin we la ya'.

We manäq ri ya' junan rik'in manäq qaway, junan rik'in manäq qaq'aq'. Ronojel nuk'än pe ri ya', junan rik'in ri k'o qasi', we manäq qab'oxb'äl man ütz ta nqab'än ti qaq'aq'. Ke ri', ri ya' kan yalan we ruq'ij. Ri ya' stape' k'o awixim we manäq ya' ja ri manäq nab'än che re richin narqowsaj, roma ri' janina nk'atzin ri ya'.

Ri k'oton ya', achi'el nkib'ij ri winäq we xa nak'ek'e'j ja ntzaq el. Chuqa' ri ya' k'o kixajanib'al, man ta ke ri ri', man ta nb'e. Achiel röj, k'o qaya' qak'oton toq rub'anon kan, we nroq'och'itej el ri pajb'äl:

—Ütz k'a ri' man xuxib'ij ta el ri' ri qaya' —yojcha'.

Ja ri' nb'e nb'e la ya'.

Ri nkib'än che re nkikanoj taq b'oyo'y taq e wita ok, nkiya' el atz'am chi rupam richin nujäk' ri ya', ja ri npe k'i'y ya' nkib'ij. Ri raqän ya' man kan ta wetaman rub'anikil, xa xe k'o taq k'oton ya' chi ruchi' ke taq ri' ja ri yechaqer qa.

Rin nutz'eton jun b'ey ruk'u'x ya' nqab'ij chi richin. Ri ojer kan, rin xintz'et jun kumätz k'o chi rupam ri qak'oton ya'. Jun q'ij ri' jun qak'uljay xukamisaj,

xtik̄ir xukamisaj ri kumätz pa ya', man üt̄z ta nuna' rija' nuq̄üm ri ya' roma ri kumätz.

Xuq̄'ijuj xukamisaj ri kumätz, achike xub'än taq xukamisaj ri kumätz xchaqer ri k'oton ya, taq xqanab'ej xa ja ri jun qak'uljay xkamisan kan ri kumätz, ja ri manäq ch̄ik qaya' wakamin. Xa k'o ruxajanib'al ronojel, xa ja röj man nqanimaj ta.

Achi'el nqab'ij wakamin chi ri winaqi' yeb'e pa etamab'äl nk'oje' pa kijolom chi re xa man jun ketaman, xa chaq nkib'ij naq kina'oj ta.

Rin ja re' nutz'eton che re ye' k'o ruxajanib'al.

Achi'el ninquqa' qa rin xa xe xkamisäx ri kumetz k'o chi rupam ri ya' ja ri xchaqer; xchaqer ri ya', xu xa naqaj ok k'o wi ri ya', xa kan nitz' ok k'oton qa ri ulew ja ri k'o ri ya' chi ri'. Wakamin manäq ch̄ik ri ya' roma ri kumetz xkamisäx chi rupam ri k'oton ya'.

Ri k'oton ya' we nk'ayix ri ya' k'o chi rupam ntzolöj el ri ya', ja ruxajanib'al ri', we nak'ayij la ya' ntzaj. Roma ri' taq jun winäq nrajo' nuloq' ruya' nb'ix pe chi re:

—Xa manäq ri, xa manäq ri —yecha'.

—Xa kan xe k'a richin rajel qakolo' —yecha' ri winaqi' nkik'ul kan.

—We nak'ayij ri ya', xa man nk'oje' ta ruk'ux ri ya' —nkib'ij.

Kan qitzij nkib'ij ri winaqi', we xa chöj nasipaj ri ya' yalan nk'oje' ruk'u'x ri ya', man nk'is ta, man nik'is ta, we xa xak'ayij eqal eqal nb'echaqer.

Roma ri' konojel ri winaqi' nkisipaj. Chuqa' K'o ch̄ik ch'aqa winaqi' nkib'ij :

—Manäq, xa manäq ya', nk'is yan qa —yecha'. Roma nkik'ek'ej nkisipaj pe jub'a' ya' ke ri' nkib'ij pe chi awe, chuqa' ja ri nb'anun chi nb'echaqer ri kiya'. Ronojel k'a re' ja ri rub'anikil ri k'oton ya' e k'o chi ruchi taq jay.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike nk'atzin wi ri ya'?
2. ¿Achike nb'erub'ana' we manäq ya'?
3. ¿Achike ruxajanib'al ri ya'?
4. ¿Achike roma yechaqer ri ya'?

5. ¿Ütz, man ütz ta nak'ayij ri ya'?
6. ¿Achike roma xchaqer ri k'oton ya' nub'ij chi rupam re jun tzijonik re ye'?
7. ¿Achike nk'atzin we chi ke ri tikonela' ri ya'?

CH'OB'ONİK

Achike naq'ijuj chi rij re jun tzijonik re ye' ri xtzijöx chi awe.

TZIJ UKUSAN CHI RUPAM RE TZIJONİK RE YE'

Man nb'e ta chik. Man nk'ayitäj ta chik.

K'atzinej wi. K'atzinel wi.


Yechaqer. Yechaq'ij.

Nroq'och'itäj. Nraqach'itäj.

Taq. Toq.

Quqa'. Q'ijuj, ch'ob'ik.

Ntzolöj. Ntzolin.



ROLAJUJ TZIJONĪK

RI TIJOB'ÄL

Taq nb'an jun tijob'äl, k'o chi ntz'et achike nk'atzin chi ke ri ak'wala', e janipe' ak'wala' e k'o chi rupam ri tinamit. Ri tijob'äl toq nb'an qa k'o chi chawon nb'an chi re, richin ke ri yek'oje' ützi ri ak'wala' chi rupam, man ta b'aj latz' yek'oje' chi rupam ri tijob'äl. K'o tijob'äl ri b'aj e latz', e k'iy ak'wala' yek'oje' chi rupam jun jay, achi'el nkejqaj ki', ¿achike roma?, roma man nkitz'et ta nab'ey ri yeb'anon qa.

Chuqa' jun tijob'äl k'o chi ntz'et akuchi' nb'an wi. Jun tijob'äl k'o chi nb'an akuchi' ützi yaq'ijun, yach'ob'on wi, akuchi' man yeq'ax ta ch'ich'. Chuqa' jun tijob'äl k'o chi nk'oje' näj akuchi' e k'o wi' ri kaminaqi'.

Ri achin ri nb'anon jun tijob'äl nk'atzin chi retaman achike rub'anikil jun tijob'äl, achike nk'atzin che re jun tijob'äl.

Jun chik k'ayewal ri k'o pa taq qatinamit ja ri manäq tijob'äl, janina nk'atzin k'iy tijob'äl juk'an chik tinamit.

Achi'el pa qatinamit röj k'o tijob'äl; k'o tinamit yab'e'apon chi rupam manäq tijob'äl natz'et.

Ri janila nkil k'ayewal chi ruwäch ri qatinamital ja ri ak'wala' aj pa q'ös, chi ri' nqatz'et wi chi manäq tijob'äl. Toq k'o tijob'äl man kan ta e ützi roma manäq ya', manäq saqil, manäq ch'okolb'äl, manäq ch'atel. Roma k'a ronojel re' nqatz'et chi ri ak'wala' aj pa q'ös man ketaman ta yetz'ib'an, man ketaman ta nkisik'ij ruwa wuj.

Yeqatz'et ri ak'wala' aj pa q'ös kejqajlon taq kich'akat, kich'atel, xa ja rije' e uk'wayon xtaq kiwachinäq akuchi' yesamäj wi, ja ri' janina ruk'ayewal, roma ri' man nketamaj ta jab'el ri tijonik.

Chuqa' taq yeb'an ri ch'akät, ri ch'atel k'o chi npe chi rij ri achi'el kib'anikil ri ak'wala'. K'o tijob'äl k'o kich'atel, xe k'a wi manäq e nim yalan e ko'öl ok chi ke ri ak'wala'.

Taq ke re' kib'anikil ri ch'atäl, ri ch'akät man ützi ta yetz'uye' pa ruwi', k'o b'ey man nb'ekiq'i' ta el, k'o b'ey re' nim nub'an chi ke; roma ri man ützi e tz'uyül man nketamaj ta chik ri tijonik. Ri ch'akät, ri ch'atel k'o chi nb'an achi'el taq kib'anikil ri ak'wala'.

Ri janina k'atzinel chi rupam jun tijob'äl ja ri ch'akät, ri ch'atel, we manäq re re', manäq akuchi' yesamäj ri ak'wala'. K'o tijob'äl nqatz'et k'o akuchi' yesamäj wi ri ak'wala' xe k'a man achi'el ta xtaq kipalen rije'. K'o tijob'äl qatz'eton chi

pa ruwi' jun ch'akät yetz'uye' janíla ak'wala', nkipitz'ila' ki' pa ruwi', juntäq man yerub'än ta, k'o chi yek'oje' qa pan ulew. Roma k'a ri' chi rupam jun tijob'äl nk'atzin chi k'o k'iy ch'akät richin ütз yesamäj ri ak'wala'.

Chi rupam jun tijob'äl nk'atzin jun nimajay, jun wujib'äl jay, jun yakb'äl ojer taq wachinäq, ruxkin jay, akuchi' ntik kotz'i'j, jun aq'omab'äl jay; ja ri' ri k'atzinel nuk'wa'j jun tijob'äl.

Jun wujib'äl jay nk'atzin richin nretamaj jun ak'wal ronojel ri nk'üt pe chi ruwäch. Taq k'o ch'ab'äl man nq'ax ta chi ruwäch ri ak'wal ütз nb'e pa wujib'äl jay, nb'erukanoj chi ruwäch ch'aqa ch'ik wuj richin nr'il rusolik ri man nq'ax ta chi ruwäch. Toq manäq wujib'äl jay achike nub'än ri ti ak'wal richin nuchojmirisaj ri man q'axnäq ta pa rujolom; taq manäq wujib'äl, manäq wuj richin ri etamab'äl nya'öx che re jun ak'wal, jun tijob'el ke re' man ütз ta.

Jun aq'omab'äl jay chuqa' janina k'atzinel, nqatz'et k'o ak'wala' b'aj kiyab'il, yeyawäj qa chi rupam jun tijob'äl, nq'axom kipam, nq'axon kijolom, rik'in jub'a' manäq ti rupeq richin nb'eruloq'o' pe ti raq'om. Roma ri' janina k'atzinel nk'oje' jun aq'omab'äl chi rupam jin tijob'äl roma wi nq'axom pe kijolom, nq'axom pe kipam ri tijoxela' ütз ye'awoq'omaj chi ri', stape' xa jun q'axb'äl q'axom nya'öx che re xa xe k'a nch'uch'ur qa ri ruq'axomal.

Chuqa' nk'atzin jun nimajay richin nkib'än kinimaq'ij chi rupam. K'o tijob'äl nkib'än kinimaq'ij chi ruchi' ri tijob'äl, ri ak'wala' yetz'uye' chi ruchi' ri tijob'äl, roma ri' k'atzinel jun jay nim richin nkib'än kinimaq'ij.

Chi rupam jun tijob'äl nk'atzin jun ruwajay ri akuchi' ye'etz'an ri ak'wala' taq noqa ri ramaj richin ri uxlanik. Ri uxlanik nk'atzin richin man nk'o ta kik'u'x ri tijoxela'. Roma ri' xqab'ij yan qa chi janina k'atzinel chi jun tijob'äl nim jub'a' richin ke ri' ri tijoxel man nuna' ta chi tz'apel, richin nuna' achi'el ta chi rachoch k'o wi.

TATZ'IB'AJ RI NK'UTÜX CHI AWE PA RUWI' RE TZIJONİK RE YE'

1. ¿Achike k'atzinel chi netamäx nab'ey richin nb'an qa jun tijob'äl?
2. ¿Akuchi' nqatz'et wi chi k'o janíla k'ayewal roma manäq tijob'äl?
3. ¿Achike kib'anikil ri ch'akät, ri ch'atel k'atzinel chi ke ri ak'wala' pa tijob'äl?
4. ¿Achike jay e k'atzinel chi rupam jun tijob'äl?
5. ¿Achike nk'atzin wi jun wujib'al jay chi rupam jun tijob'äl?
6. ¿Achike nk'atzin wi jun nimajay chi rupam jun tijob'äl?

CH'OB'ONĪK

Tatz'ib'aj achike nach'öb' chi rij re jun na'oj tz'ib'an chi rupam re jun wuj re ye'.


TZIJ UKUSAN CHI RUPAM RE TZIJONĪK RE YE'

Pa q'ös, pa juyu'. Ja ri man pa tinamit ta, nb'ix ke ri' chi re ri akuchi' k'o kachoch ri winäqi' e k'o pa juyu'.

Ch'atel. Ja ri nk'atzin richin yatz'ib'an pa ruwi', yawa' pa ruwi'.

Ch'okelb'äl, tz'uyub'äl. K'atzinel richin yatuxlan pa ruwi' toq at kosnäq yab'e'apon pa jay.

Chuqa'. Chiqa'.



RICHIN TZ'IB'ANĪK

[illegible]

This image shows a single sheet of white paper with horizontal ruling lines. The lines are evenly spaced and run across the width of the page. There is no text or other markings on the paper.

RICHIN TZ'IB'ANĬK

RUCHOLAJEM RE SAMAJ

Ka'i' oxi' taq tzij pa ruwi' re wuj re'	III
Nab'ey tzijonik	
Ruk'ayewal ri manäq tata'aj kik'in ri alk'walaxela'	5
Ruka'n tzijonik	
Ri k'aslemal wakamin	8
Rox tzijonik	
Ri samaj richin nqaq'axab'ej qi'	11
Rukaj tzijonik	
Ri alib'atzi'	14
Ro' tzijonik	
Ri winäq nkitij kiq'ij pa ruwi' kik'aslemal	16
Ruwaq tzijonik	
Ri pixa' chi ke ri alk'walaxela'	19
Ruwuq tzijonik	
Ruk'aslemal jun meb'a'	21
Ruwaqxaq tzijonik	
Ri pik'o	24
Rub'elej tzijonik	
Ri rurayb'äl jun xtän	28
Rulajuj tzijonik	
Ri kikotemal nkiya' ri ak'wala'	33
Rukab'lajuj tzijonik	
Ri k'atzinel nk'üt chi kiwa ri ak'wala'	36
Roxlajuj tzijonik	
Ri k'oy	38
Rukajlajuj tzijonik	
Ri ruk'atzinel ri ya'	41
Rolajuj tzijonik	
Ri tijob'äl	44
Richin tz'ib'anik	47

